

LUCAS

Introdusaun

¹Doben Teofilo, ema barak haka'as an ona atu haktuir buat hirak ne'ebé mosu iha ita leet, ²nu'udar sira ne'ebé haree ho matan rasik houri uluk no sira ne'ebé haklaken liafuan hato'o mai ita. ³Tan ne'e, ha'u hanoin atu, buka tiha atu hatene lo-los buat hotu houri uluk kedas, ha'u hakerek fali di-diak buat hirak ne'e ba o, ⁴atu o bele hatene katak lia hotu ne'ebé o simu, lia los duni.

João Baptista nia moris

⁵Iha tempu ne'ebé liurai Herodes ukun iha Judeia, iha am'lulik ida naran Zacarias, husi Abias nia uma-kain. Nia kaben naran Isabel mai husi Aarao nia uma-kain. ⁶Sira na'in rua ema diak los iha Maromak futar oin. Sira halo tuir ho laran mos Na'i nia ukunfuan hotu. ⁷Maibé sira oan la iha, basa Isabel la ko'us, no sira nia otas boot ona.

⁸Wainhira Zacarias ho nia maluk am'lulik sira serbi iha Na'i futar oin, ⁹tuir sira nia lisan, sira dada sorte, hodi fihir nia atu sunu kiarben morin iha Na'i nia santuariu. ¹⁰Povu tomak hamulak iha liur iha oras ne'ebé hasa'e kiarben morin. ¹¹Na'i nia anju mosu ba Zacarias iha altar nia sorin kuana. ¹²Haree tiha ne'e, Zacarias hakfodak hodi tauk teb-tebes. ¹³Maibé anju dehan ba nia: "Keta tauk, Zacarias, basa Maromak rona tiha o nia hamulak. O nia kaben Isabel sei ko'us oan mane ida. O sei hanaran nia João. ¹⁴O sei haksolok teb-tebes; ema barak sei hetan ksolok wainhira nia moris. ¹⁵Nia sei sai boot iha Maromak futar oin. Nia sei la hemu tua ka buat ne'ebé halo ema lanu. Iha nia inan nia knotak kedas, nia sei sai nakonu ho Espiritu Santu. ¹⁶Nia sei halo Israel nia oan barak fila fali ba Na'i, sira nia Maromak. ¹⁷Nia sei la'ulo uluk Na'i ho Elias nia espiritu no kbiit, atu halo aman sira nia fuan fila ba sira nia oan sira, no mos halo ema fuan tos sira hatene lo-los nu'udar ema matenek sira, atu hadia ba Na'i povu ida ne'ebé diak los." ¹⁸Zacarias hatán ba anju: "Oin sa ha'u bele hatene buat hirak ne'e? Ha'u katuas ona, no ha'u nia kaben mos ferik ona." ¹⁹Anju simu fali: "Ha'u mak Gabriel ne'ebé hamriik iha Maromak futar oin. Nia haruka ha'u mai atu koalia ba o, hodi hato'o ba o lia foun diak ida ne'e. ²⁰Maibé o sei sai monok hodi la koalia tan to'o loron ne'ebé buat hirak ne'e sei mosu, basa o la fiar ha'u nia liafuan ne'ebé sei sai tuir los iha nia tempu."

²¹Ema lubun boot hein Zacarias iha liur hodi hakfodak, basa nia hela kleur iha santuariu laran. ²²Wainhira nia sai, nia la bele koalia ba sira; tan ne'e sira hatene katak nia hetan visaun ida iha santuariu. Nia halo sinal oi-oin ba sira, hodi hela monok nafatin. ²³Wainhira nia loron atu serbi hotu ona, nia fila ba uma. ²⁴Liu tiha loron hirak ne'e, nia feen Isabel ko'us, hodi haksumik an iha fulan lima nia laran. Nia dehan: ²⁵"Nune'e mak Na'i halo mai ha'u, hodi fase ha'u nia moe iha ema hotu nia oin."

Anju Gabriel fo hatene Jezús atu moris

²⁶Liu tiha fulan neen, Maromak haruka anju Gabriel ba knua ida Galileia nian, naran Nazare, ²⁷ba fetoran ida ne'ebé hakotu tiha ona ba mane ida naran Jose, husi David nia uma-kain; fetoran ne'e naran Maria. ²⁸Tama tiha iha nia uma, anju dehan: "Rahun diak, feto kmanek wa'in tebes! Na'i ho ita!" ²⁹Rona tiha lia ne'e, nia laran taridu hodi husu ba nia an rasik kumprimentu ne'e katak sa los. ³⁰Anju dehan ba nia: "Keta tauk, Maria; basa o hetan rahun diak tebes iha Maromak futar oin. ³¹O sei ko'us no tur ahi oan mane ida. O sei hanaran Nia Jezús. ³²Nia sei sai ema boot; sei hanaran An Na'i aas liu hotu nia Oan. Na'i Maromak sei haraik ba Nia nia aman David nia kadunan. ³³Nia sei ukun Jacob nia uma-kain ba nafatin; nia ukun sei rohan laek." ³⁴Maria husu ba anju: "Ne'e sei sai oin sa los, basa ha'u la hola mane?" ³⁵Anju hatán ba nia: "Espiritu Santu sei tun ba o no Na'i aas liu hotu nia kbiit sei hamahan o. Tan ne'e santu ne'ebé atu moris sei hanaran An 'Maromak nia Oan.' ³⁶O nia feto maluk Isabel mos ko'us tiha oan mane ida, maski ferik ona. ³⁷Ida ne'ebé ema dehan la ko'us, nia ko'us fulan neen ona; basa, ba Maromak, la iha buat ida ne'ebé la bele." ³⁸Maria dehan: "Ne'e sa, Na'i nia atan oan mak ne'e. Halo tuir ita liafuan ba!" Hafoin anju husik nia.

Maria ba haree Isabel

³⁹Iha loron hirak ne'ebá Maria hiit an lalais ba foho, ba knua ida iha Juda. ⁴⁰To'o tiha Zacarias nia uma, nia kumprimenta Isabel. ⁴¹Wainhira Isabel rona Maria nia lia, kosok oan book an iha nia knotak ho ksolok. Nakon ho Espiritu Santu, ⁴²Isabel hahu koalia, dehan: "Ita boot diak liu feto hot-hotu! Ita boot nia oan diak liu! ⁴³Be ha'u se los atu ha'u Na'i nia inan hiit an mai ha'u nia uma? ⁴⁴Basa, ita lia to'o tiha iha ha'u tilun, kosok oan book an kedas iha ha'u knotak. ⁴⁵Rahun diak ba ida ne'ebé fiar katak lia ne'ebé Na'i hateten sei sai tuir los duni." ⁴⁶Maria hatán:

Maria nia knananuk

"Ha'u klamar hahi Na'i,
⁴⁷ha'u neon haksolok
iha Maromak ha'u Maksoin.
⁴⁸Basa Nia haree nia atan feto ne'ebé folin laek.
Tebes duni, houri ohin ba oin
Ema hotu sei dehan ha'u rahun diak.
⁴⁹Basa Ida ne'ebé bele buat hotu
halo buat kmanek wa'in tebes mai ha'u.
Nia naran santu.
⁵⁰Nia laran luak houri otas
ba sira ne'ebé hamtauk Nia.
⁵¹Nia hatudu nia liman nia kbiit,
hodi halakon ema loko an sira.
⁵²Nia hamonu ukun na'in sira
husi sira nia tur fatin,
hodi foti fali ema kiik sira.
⁵³Nia haraik buat diak hotu ba mukit sira,
hodi haruka riku sira
ba ho liman mamuk.
⁵⁴Nia tau matan ba nia atan Israel
hodi hanoin fali nia laran luak,
⁵⁵tuir lia menon ne'ebé Nia hakotu ona
ba ita nia bei-ala sira,
ba Abraao no nia bei-oan sira ba nafatin."

⁵⁶Maria hela ho Isabel besik fulan tolu, hafoin fila fali ba nia uma.

João nia moris

⁵⁷Wainhira tempu to'o ona ba Isabel, nia tur ahi oan mane ida. ⁵⁸Rona tiha katak Na'i hatudu laran luak boot ba nia, nia maluk no parenti sira haksolok ho nia. ⁵⁹Liu tiha loron ualu, sira mai atu halo sirkunsisaun kosok oan nian. Sira hakarak hanaran nia Zacarias, hanesan nia aman; ⁶⁰maibé nia inan dehan: "Lae, nia naran mak João." ⁶¹Sira dehan fali ba nia: "Iha imi nia parenti sira leet la iha ema ida ho naran ne'e." ⁶²Tan ne'e, ho sinal oi-oin, sira husu ba

nia aman oin sa nia hakarak hanaran nia oan. ⁶³Nia husu surat tahan ida hodi hakerek: “Nia naran João.” Sira hotu hakfodak. ⁶⁴Zacarias niaibun nakloke kedas, nia nanal mamar fali, nia koalia hodi hawelok ba Maromak. ⁶⁵Sira hotu ne’ebé hela besik ne’ebá tauk teb-tebes. Lia hirak ne’e hotu naklekar iha foho rai Judeia tomak. ⁶⁶Sira hotu ne’ebé rona buat hirak ne’e rai hela iha sira nia laran hodi dehan ba sira an rasik: “Labarik ne’e sei sai sa los?” Basa, tebes duni, Na’i nia liman hela ho nia.

Zacarias nia knananuk

⁶⁷Tuir mai, nia aman Zacarias, nakonu ho Espiritu Santu si’ik, dehan:

⁶⁸“Rahun diak ba Na’i, Israel nia Maromak,
basa Nia mai haree hodi soi nia povu.

⁶⁹Nia foti Maksoin maka’as ida mai ita
iha nia atan David nia uma,

⁷⁰nu’udar Nia hakotu tiha ona
husi nia profeta santu uluk sira ibun.

⁷¹atu soi ita husi ita nia funubalun sira
no husi sira hotu ne’ebé hirus ita sira liman,

⁷²atu hatudu nia laran luak ba ita nia bei-ala sira
hodi hanoin nia moruk santu:

⁷²katak, juramentu ne’ebé Nia halo tiha ba ita nia aman Abraao,

⁷⁴hodi haraik mai ita atu,
sai tiha husi ita nia funubalun sira liman,
ita serbi Nia ho aten berani,

⁷⁵ho moris los no santu,
iha nia futar oin iha ita nia moris tomak.

⁷⁶O, kosok oan, ema sei hanaran o

Na’i Aas liu hotu nia profeta,

Basa o sei ba uluk Na’i

Atu hadia dalan ba Na’i,

⁷⁷hodi fo hatene ba nia povu nia maksoin,
atu sira hetan perdu ba sira nia sala.

⁷⁸Tanba ita nia Maromak laran luak teb-tebes,
mak naroman husi leten aas sei mai visita ita,

⁷⁹atu leno sira ne’ebé tur iha nakukun laran
no iha mate nia ukun,
hodi lori ita nia ain tuir dalan dame nian.”

⁸⁰Labarik sai boot, nia laran metin liu tan. Nia horik iha rai fuik maran to’o loron ne’ebé nia hatudu an ba Israel.

2

Jezús nia moris

¹Iha loron hirak ne’ebá Cesar Augusto fo sai ukunfuan ida, hodi haruka ema iha mundu tomak atu ba tau naran. ²Ukunfuan ne’e mak sira hala’o ba dala uluk wainhira Quirino mak emboot iha rai Siria. ³Ema ida-ida ba tau naran iha nia sidade rasik. ⁴Tan Jose mai husi David nia uma-kain, nia mos husik sidade Nazare iha Galilea, hodi sa’e ba Judeia, ba David nia sidade naran Belem, ⁵atu tau naran ho nia kaben Maria, ne’ebé besik atu tur ahi. ⁶Wainhira sira sei iha ne’ebá, Maria nia loron atu tur ahi to’o dau-daun. ⁷Nia tur ahi nia oan mane boot, hodi haneras no hatoba nia iha balada han fatin, basa la iha fatin oan ida ba sira iha uma laran.

⁸Iha fatin ne’ebá iha bibi atan balun, ne’ebé kalan kalan hein sira nia bibi iha rai luan. ⁹Na’i nia anju mosu ba sira. Maromak nia gloria nabilan iha sira leet. Sira hakfodak teb-tebes. ¹⁰Tuir mai anju dehan ba sira: “Imi keta tauk, basa ha’u lori liafoun diak ida ba imi, ne’ebé sei haksolok mos povu tomak: ¹¹ohin iha David nia sidade foin moris ba imi Maksoin ida, katak Kristu Na’i. ¹²Sinal atu imi hetan Nia mak ne’e: imi sei hetan kosok oan ida haneras no toba iha balada han fatin.” ¹³Teki-teki halibur hamutuk ho anju ne’e anju lubun boot ida ne’ebé hahi Maromak, dehan: ¹⁴“Gloria ba Maromak iha leten aas, dame iha raiklaran ba ema sira ne’ebé Nia hadomi!” ¹⁵Wainhira anju sira fila ba lalehan, bibi atan sira hateten ba malu: “Ita la’o to’ok ba Belem, hodi haree buat ne’ebé mosu, ne’ebé Na’i fo sai mai ita.” ¹⁶Sira ba halai, hodi hetan duni Maria, Jose no Kosok Oan hatoba hela iha balada han fatin. ¹⁷Haree tiha Nia, sira haktuir buat ne’ebé anju sira hateten kona ba kiik oan ne’e. ¹⁸Ema hotu ne’ebé rona bibi atan sira hakfodak ho sira nia liafuan. ¹⁹Maria fali rai hela liafuan hirak ne’e hotu, hodi hanoin di-diak iha nia laran. ²⁰Bibi atan sira fila ba uma hodi hahi hawelok Maromak tan buat hotu ne’ebé sira haree no rona, nu’udar anju sira fo hatene nanis.

²¹Liu loron ualu, wainhira labarik atu simu sirkunsisaun, sira hanaran Nia Jezús, nu’udar anju fo hatene molok nia inan ko’us.

Jezús nia aman sira lori Nia ba templu

²²Liu tiha tempu hamos an nian, tuir Moises nia ukunfuan, sira lori labarik ba Jerusalem atu saran Nia ba Na’i, ²³nu’udar hakerek iha Na’i nia ukunfuan, katak “Oan mane boot hotu sei saran ba Na’i.” ²⁴no mos atu hasa’e, nu’udar karan, manu falur rua eh manu pombu oan rua, nu’udar Na’i nia ukunfuan haruka. ²⁵Iha Jerusalem moris ema ida naran Simeao. Nia ema los ne’ebé hamtauk Maromak; nia hein Israel nia ksolok, no Espiritu Santu horik ho nia. ²⁶Nia simu lia husi Espiritu Santu katak nia sei la mate molok nia haree Na’i nia Kristu. ²⁷Tuir Espiritu nia kbiit nia mai iha templu. Wainhira nia aman sira lori Jezús atu halo tuir ukunfuan, ²⁸nia simu Kosok Oan iha nia liman, hodi hahi Maromak, dehan:

Simeao nia knananuk

²⁹“Na’i, oras ne’e Ita Boot bele husik ona
Ita atan ba ho dame, tuir Ita nia liafuan;

³⁰basa ha’u nia matan haree ona Maksoin
ne’ebé Ita Boot hadia ba povu hot-hotu:

³²naroman atu leno gentiu sira
no povu Israel nia gloria.”

³³Labarik nia aman inan sira hakfodak ho buat ne’ebé nia dehan kona ba Nia. ³⁴Simeão fo bensa ba sira, hodi dehan ba nia inan Maria: “Haree ba, labarik ne’e mosu mai atu hatun no foti ema barak iha Israel, no mos atu sai sinal ida ne’ebé halo ema nia lia la tuir malu; ³⁵no surik ida sei sona borus ita nia fuan, atu fo sai buat ne’ebé ema barak hanoin iha sira nia laran.”

³⁶Iha mos feto duina ida, naran Ana, Fanuel husi suku Aser nia oan. Nia otas boot ona. Liu tiha nia tempu fetoran nian, nia kaben tinan hitu; ³⁷hafoin nia moris nu'udar feto faluk to'o nia tinan ualu nulu resin haat. Nia la husik templu, maibé serbi Maromak kalan loron, hodi halo jejum no hamulak. ³⁸Iha oras ne'ebá nia mai hodi hahi Na'i no koalía kona ba Labarik ne'e ba sira hotu ne'ebé hein Israel nia maksoin.

³⁹Halo tuir tiha buat hotu ne'ebé Na'i nia ukunfuan haruka, sira fila fali ba Galileia, ba sira nia sidade iha Nazare. ⁴⁰Labarik oan mos sai boot ba dau-daun no maka'as liu tan, hakonu ho matenek, no Maromak nia grasa hela hamutuk ho Nia.

Jezús iha templu

⁴¹Tinan tinan Jezús nia inan aman sira ba Jerusalem iha festa Paskua. ⁴²Wainhira Nia halo tinan sanulu resin rua, sira sa'e ba Jerusalem, tuir lisan festa nian. ⁴³Festa hotu tiha, sira fila hikas ba uma, maibé Jezús hela iha Jerusalem; nia aman sira la hatene. ⁴⁴Sira hanoín katak Nia la'o ho maluk sira. La'o tiha loron ida, mak sira buka Nia iha parenti no maluk sira leet. ⁴⁵Tan la hetan Nia, sira fila fali ba Jerusalem hodi buka Nia. ⁴⁶Liu tiha loron tolu, sira hetan fali Nia iha templu, tur hela iha ema matenek sira leet, hodi rona no husu sira. ⁴⁷Ema hotu ne'ebé rona Nia hakfodak ho nia matenek no nia liafuan. ⁴⁸Haree tiha Nia, nia aman sira hakfodak teb-tebes. Nia inan hateten ba Nia: "Ha'u oan, tansa O halo nune'e mai ami? O nia aman ho ha'u neon susar teb-tebes hodi buka O." ⁴⁹Nia dehan ba sira: "Tansa imi buka Ha'u? Imi la hatene katak Ha'u sei hela iha Ha'u Aman nia uma?" ⁵⁰Maibé sira la komprende lia hirak ne'e katak sa. ⁵¹Jezús tun fali hamutuk ho sira ba Nazare, hodi halo tuir sira nia hakarak. ⁵²Nia inan rai lia hirak ne'e hotu iha nia laran. No Jezús sai boot ba dau-daun iha otas, matenek no kmanek, iha Maromak no ema sira oin.

3

João Baptista nu'udar manu-ain

¹Iha tinan sanulu resin lima liurai boot Tiberio nia ukun nian, wainhira Poncio Pilatos mak emboot iha rai Judeia, Herodes liurai iha rai Galileia; Filipe, Herodes nia alin, liurai iha Itureia no Trakonitide, no Lisania liurai iha rai Abilene; ²wainhira Anas ho Caifás mak hala'o knaar am'lulik boot nian, Na'i Maromak nia lia tun ba João, Zacarias nia oan, iha rai fuik maran. ³João la'o lemo rai besik mota Jordao nian, hodi haklaken ba ema hotu baptisnu atu hakribi sala hodi hetan perdua, ⁴nu'udar hakerek ona iha livru profeta Isaías nian, dehan:

"Lia ida hakilar iha rai fuik maran:

'Hadia Na'i nia dalan!

Halos Na'i nia dalan inuk!

⁵Taka tiha rai klean hotu!

Hatun foho tomak, aas no badak!

Halos dalan kleuk!

Halo kabér dalan aat hotu!

⁶No ema tomak sei haree Maromak nia maksoin!"

⁷Ne'e duni, nia dehan ba ema lubun boot ne'ebé mai atu simu baptisnu husi nia: "Imi ema aat sira! Se mak hanorin imi atu halai husi hirus boot ne'ebé atu mai dau-daun? ⁸Imi buka hatudu ho hahalok katak imi hakribi duni imi nia sala. Keta hahu hateten ba imi an rasik: "Abraao mak ami nia aman"; basa ha'u dehan ba imi katak husi fatuk sira ne'e Maromak bele fo oan sira ba Abraao. ⁹Ohin kedas baliun iha ona ai-abut sira. Tan ne'e, ai-hun ne'ebé la fo fuan sei tesi tiha hodi soe ba ahi."

¹⁰Ema lubun boot husu ba nia: "Ami sei halo sa los?" Nia hatán: ¹¹"Ema ne'ebé iha hatais tahan rua, fahe ho maluk ne'ebé la iha; no ema ne'ebé iha ai-han, halo mos nune'e." ¹²Publikanu sira mos mai atu simu baptisnu. Sira husu ba Nia: "Mestre, ami sei halo sa los?" ¹³Nia hatán ba sira: "Imi keta husu impostu liu ida ne'ebé estadu haruka." ¹⁴Soldadu sira mos husu ba nia: "Be, ami sei halo sa los?" Nia hatán: "Keta hanehan ema, keta duu matak ema, simu de'it ho laran imi nia kolen." ¹⁵Tan povu hein namanas, sira hanoín iha sira nia laran katak João mak Messias. ¹⁶João hatán ba sira dehan: "Ha'u sarani imi ho be, maibé Ida ne'ebé maka'as liu ha'u atu to'o mai ona. Ha'u la soi atu kore nia sapatu tali. Nia sei sarani imi ho Espiritu Santu no ahi. ¹⁷Nia kaer ona lafatik atu saar halo mos nia klobur, hodi halot nia haree iha hoka: maibé haree kain nia sei sunu tiha iha ahi ne'ebé la mate mohu!"

¹⁸Ho lia hirak ne'e no lia seluk tan, João haklaken liafoun diak ba povu. ¹⁹Maibé liurai Herodes ne'ebé João haksi'ak tanba hola Herodiade, nia alin nia kaben, no mos tanba buat aat seluk ne'ebé nia halo, ²⁰hawain liu tan nia hahalok aat sira hodi hatama João iha dadur laran.

Jezús simu baptisnu

²¹Loron ida, wainhira ema hotu simu ona baptisnu no Jezús rasik simu tiha baptisnu no sei harohan dau-daun, lalehan nakloke. ²²Espiritu Santu tun ba Nia iha manu falur nia ilas. Lia ida tun husi lalehan, dehan: "O mak Ha'u nia Oan doben ne'ebé Ha'u hadomi teb-tebes."

Jezús nia bei-ala sira

²³Wainhira Jezús hahu hanorin, Nia besik tinan tolu nulu. (Ema hotu hanoín katak) Nia mak Jose nia oan; Heli nia oan; ²⁴Matat nia oan; Levi nia oan, Melqui nia oan, Janel nia oan, Jose nia oan, ²⁵Matatias nia oan, Amos nia oan, Naum nia oan, Esli nia oan, Nagai nia oan, ²⁶Maat nia oan, Matatias nia oan, Semeim nia oan, Josech nia oan, Juda nia oan, ²⁷Joana nia oan, Resa nia oan, Zorobabel nia oan, Salatiel nia oan, Neri nia oan, ²⁸Melqui nia oan, Adi nia oan, Cosao nia oan, Elmadao nia oan, Er nia oan, ²⁹Jezús nia oan, Eliezer nia oan, Jorim nia oan, Mata nia oan, Levi nia oan, ³⁰Simeao nia oan, Juda nia oan, Jose nia oan, Jonao nia oan, Eliacim nia oan, ³¹Melea nia oan, Mena nia oan, Matata nia oan, Natao nia oan, David nia oan, ³²Jesse nia oan, Jobed nia oan, Booz nia oan, Sala nia oan, Naassao nia oan, ³³Aminadab nia oan, Admin nia oan, Armi nia oan, Esrao nia oan, Fares nia oan, Juda nia oan, ³⁴Jacob nia oan, Isaac nia oan, Abraao nia oan, Tara nia oan, Nacor nia oan, ³⁵Seruch nia oan, Ragau nia oan, Falec nia oan, Eber nia oan, Sala nia oan, ³⁶Cainao nia oan, Arfaxad nia oan, Sem nia oan, Noe nia oan, Lamech nia oan, ³⁷Matusalem nia oan, Enoch nia oan, Jaret nia oan, Maleleel nia oan, Cainao nia oan, ³⁸Enos nia oan, Set nia oan, Adao nia oan, Maromak nia oan.

4

Diabu babeur Jezús iha rai fuik maran

¹Nakonu ho Espiritu Santu, Jezús husik Jordao. Espiritu lori Nia ba rai fuik maran. ²Iha ne'ebá Nia horik iha loron haat nulu laran. Diabu babeur Nia. Iha loron hirak ne'ebá Nia la han buat ida. ³Diabu dehan ba Nia: "O Maromak nia Oan duni karik, dehan to'ok ba fatuk sira ne'e atu nakfila ba paun." ⁴Maibé Jezús hatán: "Eskritura dehan: 'Ema la moris ho ai-han de'it.'" ⁵Liu tiha ne'e, diabu lori Nia ba foho aas ida, hodi hatudu ba Nia iha tempu ida de'it reinu hot-hotu raiklaran nian, ⁶hodi dehan ba Nia: "Ha'u sei fo ba O kbiit no gloria tomak ne'e, basa buat ne'e hotu saran tiha ona mai ha'u atu fo ba ida ne'ebé ha'u hakarak. ⁷Ne'e duni, O adora ha'u karik, buat sira ne'e hotu O nian." ⁸Maibé Jezús hatán ba nia: "Eskritura dehan: 'O sei adora Na'i, o nia Maromak; Nia mesak de'it mak o sei serbi!'" ⁹Tuir mai, lori tiha Jezús ba Jerusalem hodi halo Nia hamriik iha templu nia tutun, diabu hateten ba Nia: "O Maromak nia Oan karik, soe O An husi ne'e ba kraik. ¹⁰basa hakerek nanis ona: 'Nia sei haruka nia anju sira atu tau matan ba O'; no mos: ¹¹'Sira sei lori O iha sira nia liman atu O nia ain la bele sidi iha fatuk ida.'" ¹²Maibé Jezús hatán ba nia: "Hakerek tiha ona mos katak: 'O sei la babeur Na'i, o nia Maromak!'" ¹³Koko tiha dalan oin atu babeur Jezús, diabu husik Nia to'o loron seluk.

Jezús hahu hanorin

¹⁴Nakonu ho Espiritu Santu nia kbiit, Jezús fila fali ba Galileia; nia naran sai boot iha rai tomak. ¹⁵Nia hanorin iha sinagoga hotu; ema hot-hotu hahi Nia.

Jezús iha Nazare

¹⁶Nia mai iha Nazare, iha ne'ebé Nia sai boot. Hanesan Nia halo fila fila, Nia tama iha sinagoga iha loron Sabadu. Nia hamriik atu lee. ¹⁷Sira fo ba Nia livru profeta Isaías nian. Loke tiha, Nia hetan fatin ida ne'ebé hakerek nune'e:

¹⁸“Na'i nia Espiritu iha Ha'u basa Nia kose tiha Ha'u ho mina

atu haklaken Liafoun Diak ba kiak sira;

¹⁹Nia haruka Ha'u atu haklaken maksoin ba dadur sira

no halo matan delek sira haree; atu soi sira ne'ebé ema hanehan,

hodi haklaken Na'i nia tinan rahun kmanek nian.”

²⁰Hafoin, taka tiha livru, Jezús fo ba ema ne'ebé hala'o knaar. Nia tur tiha. Ema hot-hotu iha sinagoga hateke ba Nia. ²¹Tuir mai, Nia hahu koalia ba sira, dehan: “Ohin halo tuir los duni liafuan Eskritura nian ne'ebé imi foin rona.” ²²Sira hotu hahi Nia; hodi hakfodak tan liafuan kmook ne'ebé sai husi nia ibun. ²³Sira dehan: “Ida ne'e la'os Jose nia oan?” Nia hatán ba sira: “Imi kala sei hateten mai Ha'u: ‘Doutor, bali o nia isin rasik. Buat hotu ne'ebé ami rona katak o halo iha Kafarnaum, halo mos iha ne'e, iha o nia rai.’” ²⁴Nia dehan teni ba sira: “Tebes, Ha'u dehan ba imi katak ema la simu profeta ida iha nia rai rasik. ²⁵Ha'u dehan lo-los ba imi: iha Elias nia loron, iha feto faluk barak iha Israel, wainhira lalehan taka metin ba tinan tolu no fulan neen nia laran; rai tomak hamlaha boot; ²⁶maibé Maromak la haruka Elias ba feto faluk sira ne'e ida, Nia haruka de'it ba feto faluk iha Sarepta, iha rai Sidon. ²⁷Iha Eliseu nia loron mos iha ema moras lepra barak iha Israel, maibé sira ida de'it mak hetan isin diak, katak Naaman husi rai Siria.” ²⁸Rona tiha liafuan hirak ne'e, ema hotu iha sinagoga laran nakali teb-tebes. ²⁹Sira hamriik hodi duni sai Nia husi sidade; hafoin sira lori Nia to'o rai tatinis iha foho leten, iha ne'ebé sira nia sidade harii hela, atu soe tun Nia husi ne'ebá. ³⁰Maibé Jezús liu husi sira leet, la'o tuir nia dalan.

Jezús hanorin iha Kafarnaum

³¹Nia tun ba Kafarnaum, sidade Galileia nian; iha ne'ebá Nia hanorin sira iha loron Sabadu. ³²Ema hakfodak ho nia doutrina, basa Nia koalia ho kbiit wa'in.

³³Iha sinagoga, ema ida ho espiritu foer hakilar ho lia maka'as, dehan: ³⁴“Jezús Nazare, O hakarak halo sa ida mai ami? O mai atu halo aat ami? Ha'u hatene O se los: Maromak nia santu!” ³⁵Jezús si'ak nia, dehan: “Nonok! Sai tiha husi nia!” Soe tiha ema ne'e ba rai iha sira hotu nia oin, diabu sai husi nia, la halo aat ida ba nia. ³⁶Sira hotu hakfodak no tauk, hodi hateten ba malu: “Liafuan ne'e sa los? Nia haruka ho kbiit wa'in espiritu foer sira no sira sai duni!” ³⁷Jezús Nia naran boot habelar iha fatin hot-hotu iha rai ne'ebá.

Jezús fo isin diak ba Pedro nia banin feto

³⁸Husik tiha sinagoga, Jezús ba Simão nia uma. Simão nia banin feto moras boot isin manas. Sira husu Jezús atu tulun nia. ³⁹Hakru'uk tiha ba nia, Jezús haruka isin manas, ne'ebé sai kedas husi nia. Hafoin nia hamriik hodi serbi sira.

⁴⁰Wainhira loron atu monu ona, sira hotu ne'ebé iha parenti sira ho moras oi-oin lori sira ba Jezús. Nia tau nia liman ba sira ida-ida, hodi fo isin diak ba sira. ⁴¹Diabu sira sai husi ema barak, hodi hakilar: “O Maromak nia Oan Mane!” Maibé Nia si'ak sira atu la bele koalia, basa sira hatene katak Nia mak Messias. ⁴²Iha dadersan, Nia sai hodi ba fatin fuik ida. Ema lubun boot buka Nia. Hetan tiha Nia, sira hakarak katak Nia la bele husik sira. ⁴³Maibé nia dehan ba sira: “Ha'u sei haklaken mos liafoun diak Maromak nia reinu nian ba rai selu-seluk; tan ne'e mak Ha'u mai.” ⁴⁴Ne'e duni, Nia la'o ba oin hodi hanorin iha sinagoga sira rai Judeia nian.

Jezús fihir nia eskolante sira

¹Loron ida ema lubun boot ida hale'u Jezús atu rona Maromak nia liafuan. Nia hamriik iha tasi Genesare nia ibun. ²Nia haree ro rua kesi hela iha tasi ibun. Husik tiha ro, tiha na'in sira fase hela dai. ³Sa'e tiha ba Simão nia ro, Jezús husu ba nia atu hadook ro uitoan husi tasi ibun. Hafoin, Nia tur tiha iha ro laran, hodi hanorin ema sira. ⁴Koalia hotu tiha, Nia dehan ba Simão: “Tama liu ba tasi laran no tiha ba!” ⁵Simão hatán, “Mestre, ami serbisu tiha kalan tomak, la kaer buat ida. Maibé, tan Ita mak dehan, ha'u sei soe duni dai.” ⁶Wainhira sira halo nune'e, sira kaer ikan barak teb-tebes, dai besik atu nakles. ⁷Sira leok liman hodi bolu maluk sira iha ro seluk atu mai tulun sira. Sira mai duni, hodi halo ro rua nakonu di-diak besik atu mout. ⁸Haree tiha ne'e, Simão Pedro monu ain ba Jezús, hodi dehan: “Na'i, hadook n husi ha'u, tan ha'u ema maksalak ida!” ⁹Tebes duni, nia ho nia maluk sira seluk hakfodak tanba ikan barak ne'ebé sira kaer. ¹⁰Simão nia maluk sira, katak João no Tiago, Zebedeu nia oan sira, sira mos hakfodak. Jezús dehan Simão: “Keta tauk; houri ohin ba oin o sei tiha ema.” ¹¹Dada tiha ro ba tasi ibun, sira husik buat hotu hodi la'o tuir Jezús.

Ema moras lepra hetan isin diak

¹²Wainhira Jezús hela iha sidade ida, ema moras lepra ida ba hasoru Nia. Tuku tur tiha ba rai, nia husu ho laran: “Na'i, Ita hakarak karik, Ita bele hamos ha'u.” ¹³Jezús lolo nia liman hodi kona nia, dehan: “Ha'u hakarak, sai mos ba!” Moras lepra lakon kedas. ¹⁴Jezús bandu nia atu la bele fo hatene buat ne'e ba ema ida, dehan: “La'o ba, hatudu o nia an ba am'lulik, hodi hasa'e buat ne'ebé Moises haruka nu'udar sasin ba sira tan o hetan isin diak.” ¹⁵Maibé Jezús nia naran boot naklekar liu tan. Ema barak mai atu rona Nia, no mos atu hetan isin diak. ¹⁶Maibé Nia hadook an ba fatin fuik ida, hodi hela mesa-mesak atu harohan.

Ema isin tos ida hetan isin diak

¹⁷Loron ida, wainhira Jezús tur hodi hanorin, fariseu no doutor ukunfuan nian balun tur hamutuk. Sira mai husi knua hotu Galileia nian, husi Judeia no mos husi Jerusalem. Maromak nia kbiit atu fo isin diak hela ho Nia. ¹⁸Iha oras ne'ebá, ema balun mai lori ema isin tos ida iha nia tobafatin. Sira hakarak hatama nia to'o Jezús nia oin; ¹⁹maibé, tanba ema barak taka dalan, sira sa'e ba uma nia kakuluk hodi loke kuak ida no hatun nia iha nia tobafatin ba Jezús nia oin iha ema sira leet. ²⁰Haree tiha sira nia fiar, Jezús dehan: “Belun, o nia sala sira kasu tiha ona.” ²¹Eskriba no fariseu sira hahu hanoin: “Ema ne'e se los atu koalia aat Maromak? Se mak bele perdua sala sira? Maromak de'it mak bele!” ²²Maibé Jezús hatene sira nia hanoin. Tan ne'e Nia hatán ba sira, dehan: “Imi hanoin sa ida iha imi nia laran? ²³Ida ne'ebé mak lalais liu, hateten ‘O nia sala kasu tiha ona’, eh hateten ‘Hamriik, la'o ba’?” ²⁴Ne'e duni, atu imi bele hatene katak Oan Mane iha kbiit iha rai atu kasu sala,” Nia dehan ba ema isin tos: “Ha'u haruka o: hamriik ba, foti o nia biti hodi ba o nia uma!” ²⁵Ema ne'e hamriik kedas iha sira nia oin, foti tobafatin iha ne'ebé nia uluk toba hela no la'o ba uma hodi hahi Maromak. ²⁶Sira hotu hakfodak no hahi Maromak. Sira tauk teb-tebes, dehan: “Ohin ita haree buat kmanek boot teb-tebes!”

Jezús bolu Levi

²⁷Tuir mai wainhira Jezús sai husi fatin ne'e, Nia haree ema ida naran Levi, tur dau-daun iha kobra osan fatin. Jezús dehan ba nia: “Mai, tuir Ha'u!” ²⁸Husik tiha buat hotu, nia hamriik hodi tuir Jezús.

Jezús ho ema maksalak sira

²⁹Levi halo festa boot ba Jezús iha nia uma. Publikanu barak no ema selu-seluk tan tur hamutuk ho sira iha meja. ³⁰Fariseu no eskriba sira hamuu eskolante sira, dehan: “Tansa imi han hemu hamutuk ho publikanu no ema maksalak sira?” ³¹Jezús hatán ba sira, dehan: “La'os ema isin diak sira mak kuran doutor, maibé ema moras sira. ³²Ha'u la mai atu bolu ema diak sira, maibé ema maksalak sira atu hakribi sala.”

Kona ba hadera an

³³Sira dehan ba Nia: “João nia eskolante sira hadera an hodi hamulak. Fariseu sira nia eskolante sira halo mos nune’e. Maibé, O nian sira fali han hemu.” ³⁴Jezús hatán ba sira: “Imi bele haruka noivu nia belun sira atu hadera an wainhira noivu sei hela ho sira?” ³⁵Loron sei to’o mai, wainhira ema sei hasai noivu husi sira; foin mak sira sei hadera an.”

³⁶Nia haktuir tan aiknanoi id a ne’e ba sira: “Ema ida la les hena foun ida atu taka hena tuan nia kuak; halo nune’e karik, hena foun nakles tiha, nia la los ho hena tuan. ³⁷Ema ida la rai hela tua foun iha tua fatin kulit tuan; nia halo nune’e karik, tua foun sei halo fera tua fatin kulit tuan hodi tua nakfakar de’it, tan tua fatin kulit aat ona. ³⁸Maibé tua foun sei tau iha tua fatin kulit foun, no sira rua sei la lakon. ³⁹La iha ema ida ne’ebé, hemu tiha tua tuan, hakarak hemu tan tua foun, basa nia dehan: ‘Tua tuan mak diak.’”

6

Silu batar iha loron Sabadu

¹Iha loron Sabadu ida, wainhira Jezús la’o husi to’os batar nian, nia eskolante sira silu no behu batar iha sira nia liman atu han. ²Fariseu sira dehan: “Tansa imi halo buat ne’ebé bandu iha loron Sabadu?” ³Jezús hatán ba sira: “Imi la lee buat ne’ebé David halo wainhira nia ho nia maluk sira hamlaha, ⁴katak nia tama iha Maromak nia Uma, hola paun sakrifisiu nian hodi han no fahe ba sira, paun ne’ebé am’lulik sira de’it mak bele han?” ⁵Nia dehan tan ba sira: “Oan Mane mak Sabadu nia Na’i.”

Jezús fo isin diak ba ema moras ida iha loron Sabadu

⁶Iha loron Sabadu seluk Nia tama iha sinagoga hodi hahu hanorin. Iha ne’ebá iha ema ida ho liman los mate. ⁷Eskriba no fariseu sira hateke hela ba Nia atu haree Nia sei fo isin diak iha loron Sabadu ka lae, atu nune’e sira bele hetan lia ruma hasoru Nia. ⁸Maibé, tan hatene sira nia hanoin, Nia dehan ba ema liman mate ne’e: “Hamriik ba, mai iha klaran!” Nia mai hamriik duni. ⁹Tuir mai Jezús dehan ba sira: “Ha’u husu imi: buat sa mak ema bele halo iha loron Sabadu, halo diak eh halo aat, soi ema nia moris ka halo aat nia?” ¹⁰Hafoin, hateke hale’u ba sira hotu, Nia dehan ba ema ne’e: “Lolo o nia liman ba!” Nia lolo duni, nia liman sai diak fali. ¹¹Sira laran nakali, hodi koalia ba malu atu halo oin sa los ho Jezús.

Jezús fihir eskolante na’in sanulu resin rua

¹²Iha loron hirak ne’ebá Nia sa’e ba foho atu harohan; kalan tomak Nia harohan ba Maromak. ¹³Iha dader, Nia bolu nia eskolante sira, hodi fihir husi sira leet na’in sanulu resin rua ne’ebé Nia hanaran ‘apostolu’ ¹⁴Simão, ne’ebé Nia hanaran Pedro, ho nia alin Andre; Tiago, João, Filipe ho Bartolomeu; ¹⁵Mateus, Tome; Tiago, Alfeu nia oan; Simão ne’ebé hanaran Zeloso; ¹⁶Judas, Tiago nia oan, no Judas Iscariotes ne’ebé sei saran Nia ba mate.

Ema lubun boot tuir Jezús

¹⁷Tun tiha hamutuk ho sira, Jezús para iha rai tetuk ida. Iha ne’ebá eskolante barak ho tan ema lubun boot husi rai Judeia tomak, husi Jerusalem no husi tasi ibun Tiro no Sidon nian, ¹⁸sira mai atu rona Nia no mos atu hetan isin diak husi sira nia moras. ¹⁹Sira hotu buka atu kona nia, basa kbiit sai husi Nia hodi fo isin diak ba sira hotu.

Lia rahun diak nian

²⁰Foti tiha matan ba nia eskolante sira, nia dehan: “Rahun diak ba imi sira ne’ebé kiak, basa Maromak nia reinu imi nian. ²¹Rahun ba imi sira ne’ebé oras ne’e hamlaha, basa imi sei han to’o bosu. Rahun diak ba imi ne’ebé ohin loron tanis, basa imi sei hamnasa. ²²Rahun diak ba imi, wainhira ema rai hirus hasoru imi, wainhira ema duni sai imi, tolok imi, hewai imi nia naran hanesan buat aat, tan de’it Oan Mane. ²³Iha loron ne’ebá imi haksolok ba, basa imi nia kolen wa’in tebes iha lalehan. Nune’e mak sira nia aman sira halo ba profeta sira. ²⁴Maibé susar ba imi ne’ebé riku, basa imi hetan ona imi nia ksolok. ²⁵Susar ba imi ne’ebé han to’o bosu, basa imi sei hamlaha. ²⁶Susar ba imi, wainhira ema hotu hahi imi, basa imi nia bei-ala sira halo mos nune’e ba profeta falsu sira.”

Hadomi funubalun sira

²⁷“Ha’u dehan ba imi sira ne’ebé rona dau-daun: hadomi imi nia funubalun sira, halo diak ba sira ne’ebé hirus imi; ²⁸fo bensa ba sira ne’ebé fo malisan ba imi, harohan ba sira ne’ebé hasara imi; ²⁹ba ida ne’ebé basa o nia hasan ida, fo tan o nia hasan seluk; ba ida ne’ebé hadau o nia unuk, fo tan o nia hatais; ³⁰ba ida ne’ebé husu buat ruma, fo ba; ba ida ne’ebé hola o nia sasan sira, keta husu fali. ³¹Buat ne’ebé imi hakarak ema halo ba imi, halo mos nune’e ba sira. ³²Imi hadomi karik sira ne’ebé hadomi imi, imi halo diak ida ne’ebé? Ema maksalak sira mos hadomi sira ne’ebé hadomi sira. ³³Imi halo de’it diak karik ba sira ne’ebé halo diak ba imi, imi nia diak ida ne’ebé? Ema maksalak sira mos halo nune’e. ³⁴Imi impresta de’it karik ba ema ne’ebé bele fo fali, imi halo diak ida ne’ebé? Ema maksalak sira mos impresta sira nia rikuso, hodi hein atu simu fali nia folin. ³⁵Maibé imi hadomi imi nia funubalun sira; halo diak no impresta hodi la hein atu simu buat ida. Nune’e imi nia kolen sei sai boot teb-tebes: imi sei sai Na’i aas liu hotu nia oan, basa Nia laran diak ba ema aat no ema laran makerek sira.

Laran luak

³⁶Imi buka sai ema laran luak hanesan imi nia Aman laran luak. ³⁷Imi keta hanoin aat ema, no ema sei la hanoin aat imi; imi keta duu matak ema, no ema sei la duu matak imi. Imi fo perdua, no imi sei hetan perdua. ³⁸Imi fo, no imi sei simu; ema sei tau ba imi nia liman buat diak barak to’o naresin. Basa imi halo oin sa ba ema, nune’e mos ema sei halo ba imi.”

Haree uluk o nia an

³⁹Nia dehan tan ba sira aiknanoi id a ne’e: “Ema matan delek ida bele hatudu dalan ba ema matan delek seluk? Sira na’in rua la monu hotu iha kuak laran? ⁴⁰Eskolante ida la bele sai boot liu fali nia mestre, basa eskolante diak sei halo hanesan nia mestre. ⁴¹Tansa o haree ai-rahun ida iha o nia maluk nia matan, maibé la haree ai-kabelak iha o nia matan rasik? ⁴²Oin sa o bele dehan ba o nia alin: ‘Alin, husik ha’u hasai ai-rahun husi o nia matan, wainhira o la bele haree ai-kabelak iha o nia matan rasik? Laran makerek! Hasai uluk lai ai-kabelak husi o nia matan, hafoin o sei bele haree mo-mos atu hasai ai-rahun husi o nia alin nia matan.”

⁴³“La iha ai-hun diak ne’ebé fo fali fuan aat, eh ai-hun aat ne’ebé fo fuan diak. ⁴⁴Ema bele hatene ai-hun ida-ida husi nia fuan: ema la ku’u ai figueira nia fuan husi ai-tarak sira, eh uv as fuan husi ai-fuik. ⁴⁵Ema diak hasai buat diak husi nia laran diak, ema aat hasai buat aat husi nia laran aat. Ema nia ibun koalia husi buat ne’ebé hakonu nia fuan.”

Eskolante los

⁴⁶“Tansa imi bolu ha’u ‘Na’i, Na’i’, maibé la halo tuir buat ne’ebé Ha’u hateten? ⁴⁷Ema ne’ebé mai besik Ha’u no rona hodi halo tuir ha’u nia liafuan, Ha’u sei hatudu ba imi ema ne’e hanesan sa los? ⁴⁸Nia hanesan ema ne’ebé harii uma ida: nia ke’e klean, hodi tau nia hun iha fatuk leten; wainhira mota sai boot, be baku hasoru uma ne’e, maibé la bele sobu, basa harii tiha iha fatuk leten. ⁴⁹Maibé ida ne’e rona hodi la halo tuir, nia hanesan ema ne’ebé harii tiha uma ida iha rai henek leten, hun metin la iha. Wainhira mota sai boot no be baku hasoru nia, uma ne’e monu kedas, sobu rahun aat liu.”

Senturiaun nia fiar

¹Hanorin tiha povu sira, Nia tama iha Kafarnaum. ²Senturiaun ida nia atan moras todan, besik atu mate. Senturiaun ne'e hadomi teb-tebes nia atan ne'e. ³Rona tiha kona ba Jezús, nia haruka katuas Judeu sira nian atu husu Nia mai fo isin diak ba nia atan ne'e. ⁴To'o tiha ba Jezús, sira husu namanas ba Nia, dehan: "Nia soi atu Ita haraik buat ne'e ba nia, ⁵basa nia hadomi ita nia povu; nia rasik harii ita nia sinagoga." ⁶Jezús ba hamutuk ho sira. Wainhira sira besik ona uma, senturiaun haruka nia belun sira atu hateten ba Nia: "Na'i, keta hakole an, ⁷basa ha'u la soi atu Ita tama iha ha'u nia uma. Tan ne'e mak ha'u la berani atu mai hasoru Ita. Dehan to'ok liafuan ida, no ha'u atan sei hetan isin diak. ⁸Basa ha'u, ne'ebé halo tuir ema boot liu ha'u, iha mos soldadu sira ne'ebé halo tuir ha'u. Ha'u dehan ba ida 'Ba,' nia ba; ba ida seluk, 'Mai,' nia mai; ba ha'u nia atan 'Halo ne'e', nia halo." ⁹Rona tiha liafuan hirak ne'e, Jezús hakfodak, hodi fila oin ba ema lubun boot ne'ebé tuir Nia, dehan: "Tebes, Ha'u dehan ba imi katak iha Israel mos ha'u la hetan fiar hanesan ne'e." ¹⁰Wainhira manu-ain sira to'o uma, sira hetan atan diak fali ona.

Feto faluk nia oan moris hi'as fali

¹¹Tuir mai Nia ba sidade ida naran Naim. Nia eskolante sira no ema lubun boot tuir Nia. ¹²Wainhira Nia besik ona sidade nia odamatan, ema lori atu hakoi foinsa'e ida, ne'ebé fetu faluk ida nia oan mane mesak. Ema barak husi sidade ba hamutuk ho fetu ne'e. ¹³Haree tiha nia, Na'i hanoin nia ho laran, dehan: "Keta tanis!" ¹⁴Nia hakbesik, hodi kona kaisaun. Sira ne'ebé lori nia para tiha. Hafoin nia dehan: "Klosan, Ha'u dehan ba o, hamriik ba!" ¹⁵Ema mate ne'e hader tiha, hodi tur no hahu koalita. Jezús saran nia ba nia inan. ¹⁶Ema hotu hakfodak hodi hahi Na'i Maromak, dehan: "Profeta ida mosu tiha iha ita nia leet; Maromak mai haree tiha nia povu!" ¹⁷Lia kona ba Nia naklekar ba Judeia tomak no ba rai hot-hotu besik ne'ebé.

João Baptista haruka nia eskolante sira ba Jezús

¹⁸João nia eskolante sira fo hatene ba nia buat hirak ne'e. Bolu tiha nia eskolante rua, ¹⁹João haruka sira ba Na'i atu husu: "Ita mak ida ne'ebé atu mai, ka ami sei hein ema seluk?" ²⁰To'o tiha ba Nia, sira ne'e dehan: "João Baptista haruka ami ba Ita atu husu: 'Ita mak ida ne'ebé atu mai, ka ami sei hein ema seluk?'" ²¹Iha oras ne'ebé Jezús fo dau-daun isin diak ba ema barak nia moras no terus, hodi duni sai espirtu aat sira no halo matan delek barak haree. ²²Nia hatán ba sira: "Imi ba fali hodi hateten ba João buat ne'ebé imi haree no rona: ema matan delek sira haree, ema ain aat sira la'o, ema moras lepra sira hetan isin mos, ema tilun diuk sira rona, ema mate sira moris hi'as fali, no liafoun diak haklaken tiha ba kiak sira. ²³Rahun diak ba sira ne'ebé la lakon fiar iha Ha'u."

²⁴Wainhira João nia eskolante sira ba tiha, Jezús hahu koalita ba povu kona ba João: ²⁵"Imi ba haree sa ida iha rai fuik maran? Fafulu ida ne'ebé leok iha anin? Imi ba haree sa ida? Ema ida ne'ebé hatais mesa furak? Haree ba, sira ne'ebé hatais furak no moris diak de'it hela iha ema boot sira nia uma. ²⁶Ne'e duni, imi ba haree sa ida? Profeta ida? Ne'e los; maibé Ha'u dehan ba imi katak nia boot liu fali profeta ida. ²⁷Kona ba ema ne'e hakerek tiha ona: 'Haree ba, Ha'u haruka ha'u nia manu-ain atu la'o uluk O, atu hadia dalan ba O.' ²⁸Tebes Ha'u dehan ba imi, iha fetu nia oan sira leet la iha ida ne'ebé boot liu fali João; maibé ida ne'ebé kiik liu iha Maromak nia Reinu, ema ne'e boot liu fali nia." ²⁹Ema hotu ne'ebé rona João, no mos publikanu sira, hahi Maromak hodi simu nia baptisumu; ³⁰maibé fariseu sira no doutor ukunfuan sira nian hewai Maromak nia hakarak hodi la simu baptisumu husi nia.

³¹Na'i dehan tan: "Ha'u sei tanesan ema sira otas ne'e nian ho se los? Sira hanesan se los?" ³²Sira hanesan labarik sira ne'ebé tur hakilar ba malu iha basar, dehan: "Ami hananu knananuk ksolok nian, maibé imi la dansa; ami hananu knananuk tanis nian, maibé imi la tanis." ³³Basa João mai, la han paun, la hemu tua, no imi dehan: "Nia iha diabu iha nia laran." ³⁴Oan Mane mai, han hemu, no imi dehan: "Ne'e ema kaanten no lanuten, publikanu no maksalak sira nia belun." ³⁵Maibé matenek los hatudu an iha nia eskolante sira."

Feto maksalak ida hetan perdua

³⁶Fariseu ida konvida Jezús atu han hamutuk ho nia. Tama tiha iha nia uma, Nia tur iha meja. ³⁷Tuir mai, fetu moris aat ida husi sidade, rona tiha katak Jezús mai han iha fariseu nia uma, mai lori botil ida ho mina morin, ³⁸ba Jezús nia kotuk no hahu fase Nia ain ho nia mataben, hodi hamaran ho nia fuuk, rei no kose ho mina morin. ³⁹Haree tiha buat ne'e, fariseu ne'ebé konvida nia hateten ba nia an: "Ema ne'e profeta ida karik, nia sei hatene fetu ne'e ne'ebé kona Nia se los, katak fetu aat ida." ⁴⁰Jezús hatán, hodi dehan ba nia: "Simão, Ha'u hakarak hato'o buat ruma ba ita." Nia dehan: "Koalita ba, Mestre." ⁴¹"Loron ida ema ida impresta osan ba ema na'in rua: ida halo tusan osan mean atus lima, ida seluk lima nulu. ⁴²Tanba sira na'in rua la bele selu fali, nia kasu tiha sira nia tusan. Ida ne'ebé mak sei hadomi nia liu tan?" ⁴³Simão hatán: "Ha'u hanoin katak ida ne'ebé nia tusan boot liu." No Jezús dehan: "Ita hanoin los!" ⁴⁴Hafoin Nia fila oin ba fetu, hodi dehan ba Simão: "Ita haree fetu ne'e? Ha'u tama iha ita nia uma, ita la fase Ha'u nia ain; maibé nia fakar nia mataben ba Ha'u nia ain hodi hamaran ho nia fuuk. ⁴⁵Ita la rei Ha'u, maibé nia la para rei Ha'u nia ain houri oras ne'ebé Ha'u tama mai. ⁴⁶Ita la kose mina ba Ha'u nia ulun, maibé nia kose Ha'u nia ain ho mina morin. ⁴⁷Tan ne'e, Ha'u dehan ba ita katak nia hetan perdua ona husi nia sala barak, basa nia hatudu domin boot. Ema ne'ebé hetan perdua ba sala uitoan de'it, nia mos hadomi uitoan de'it." ⁴⁸Tuir mai, Nia dehan ba fetu: "O nia sala sira hetan ona perdua." ⁴⁹Sira ne'ebé tur hamutuk ho Nia iha meja hahu hanoin: "Ema ne'e se los atu bele kasu ema nia sala?" ⁵⁰Maibé Nia dehan ba fetu: "O nia fiar mak soi tiha o; la'o ba iha dame laran."

¹Liu tiha ne'e, Nia la'o ba sidade no knua sira, hodi hanorin no haklaken liafoun diak kona ba Maromak nia reinu. Sira sanulu resin rua la'o hamutuk ho Nia, ²no mos fetu balun ne'ebé hetan diak husi moras oi-oin no husi espirtu aat sira: Maria ne'ebé ema hanaran Madalena, no husi nia diabu hitu sai tiha ona; ³Joana, Herodes nia atan Cusa nia feen, Susana no fetu seluk tan, ne'ebé tulun sira ho sira nia rikuso.

Aiknanoik fini nian

⁴Wainhira ema lubun boot halibur hamutuk, hodi hakbesik ba Nia husi sidade tomak, Jezús haktuir aiknanoik ida ne'e: ⁵"Ema ida ba kari fini. Nia sei kari hela, fini balun monu iha dalan ninin, hafoin ema sama no manu sira husi lalehan mai han sira. ⁶Finu balun monu iha fatuk leten; moris tiha, sira namlaek, basa be la iha. ⁷Finu balun fali monu iha ai-tarak laran. Ai-tarak sira moris hamutuk ho sira, hodi hanehan sira. ⁸Ikus mai, fini balun monu iha rai diak, hodi moris no fo fuan dala atus ida." Hateten tiha ne'e, Nia dehan ho lia maka'as: "Sira ne'ebé iha tilun, rona ba!" ⁹Eskolante sira husu ba Nia aiknanoik ida ne'e katak sa. ¹⁰Nia hatán: "Lialos kona ba Maromak nia reinu fo hatene tiha ona ba imi; maibé ba ema seluk hato'o de'it ho aiknanoik sira, atu 'hodi haree sira la haree los, no hodi rona sira la rona los.' ¹¹Ne'e duni aiknanoik ida ne'e katak: fini mak Maromak nia liafuan. ¹²Finu ne'ebé monu iha dalan ninin mak ema sira ne'ebé, rona tiha nia, diabu mai hodi hasai liafuan husi sira nia laran atu sira la bele hetan maksoin hodi fiar. ¹³Finu ne'ebé monu iha fatuk leten mak ema sira ne'ebé rona liafuan, hodi simu nia ho ksolok; maibé, tan abut la iha, sira fiar ba tempu uitoan de'it, hafoin husik ona iha oras susar nian. ¹⁴Finu ne'ebé monu iha ai-tarak laran, ne'e mak sira ne'ebé rona, maibé hanoin oi-oin, rikuso no ksolok mundu ne'e nian hanehan sira, la biban atu sai boot. ¹⁵No fini ne'ebé monu iha rai diak, ne'e mak sira ne'ebé rona liafuan ho neon ho laran, rai di-diak nia hodi fo fuan, tan sira laran metin."

Aiknanoik ahi-oan nian

¹⁶"Ema ida la sunu ahi-oan hodi taka nia ho luhu ida, la tau nia iha tobatatin okos; maibé tau nia iha ahi-oan fatin, atu sira ne'ebé tama mai bele haree nia naroman. ¹⁷Basa la iha buat ida ne'ebé subar hela, ne'ebé ema sei la haree hetan; la iha buat ida ne'ebé ema la hatene, ne'ebé ema seluk sei la fo sai. ¹⁸Ne'e duni, haree di-diak oin sa imi rona; basa ema ne'ebé iha sei simu tan, no husi ema ne'ebé la iha sei hasai tan buat ne'ebé nia hanoin nia iha."

Jezús nia parenti lo-los

¹⁹Nia inan no maun alin sira mai buka Nia, maibé sira la bele hakbesik ba Nia tanba ema lubun boot. ²⁰Sira fo hatene ba Nia: “Ita nia inan no maun alin sira hamriik iha liur hodi hakarak haree Ita.” ²¹Nia hatán ba sira: “Ha’u nia inan no maun alin mak sira ne’ebé rona hodi halo tuir Maromak nia liafuan.”

Jezús halo tasi hakmatek

²²Loron ida Nia sa’e ro ho nia eskolante sira. Nia dehan ba sira: “Ita hakur ba tasi sorin ba.” Sira ba. ²³Eskolante sira hean dau-daun, Nia toba dukur. Anin boot hahu hu’u iha tasi, halo be tama iha ro. Sira tauk la diak. ²⁴Sira fanu Nia dehan: “Mestre, Ita atu mout!” Nia hader, hodi si’ak anin no tasi; sira ne’e tun, no buat hotu hakmatek. ²⁵Nia dehan ba sira: “Imi nia fiar iha ne’ebé?” Sira tauk no hakfodak, hodi dehan ba malu: “Ema ne’e se los, atu haruka anin ho be, no sira tuir Nia?”

Diabu sai husi ema ida iha rai Gerasa

²⁶Sira to’o tasi ibun iha rai Gerasa, besik Galilea. ²⁷Tun tiha ba rai, mane ida, ne’ebé iha diabu iha laran, mai hasoru Nia. Kleur ona nia la hatais, la horik iha uma, maibé hela iha rate laran. ²⁸Haree tiha Jezús, nia monu ba rai iha nia oin, hodi hakilar, dehan: “Ita hakarak sa ida ho ha’u, Jezús, Maromak leten aas nia Oan? Ha’u husu ba Ita, keta fo terus mai ha’u!” ²⁹Los duni, Jezús haruka espiritu foer ne’e sai husi ema ne’e, tanba dala barak ona mak nia book ema ne’e. Ema sira kesi nia ho korente no kadeiadu atu tahan nia, maibé nia halo kotu korente no halo aat kadeiadu; no diabu lori nia ba rai fuik maran. ³⁰Jezús husu ba nia: “O naran sa?” Nia hatán: “Lubun boot,” basa diabu barak tama iha nia. ³¹Sira ne’e husu Jezús keta haruka sira atu monu ba infernu. ³²Iha ne’ebá, iha fahi lubun ida ne’ebé han dau-daun iha foho ninin. Diabu sira husu Nia atu husik sira tama ba fahi hirak ne’e. Jezús husik sira. ³³Diabu sira sai husi ema, hodi tama duni iha fahi sira. Fahi sira halai tun ba tasi laran hodi mout hotu. ³⁴Haree tiha buat ne’e, sira ne’ebé hein fahi halai, lori lia ba sidade no knua sira. ³⁵Ema sira sai ba haree buat ne’ebé mosu. Sira ba hasoru Jezús, hodi hetan ema ne’ebé diabu sira sai tiha tur besik Jezús, iha ona hatais no ho oin mos ona. Sira hotu tauk. ³⁶Sira ne’ebé haree buat ne’e, haktuir ba ema seluk oin sa ema ne’e ho diabu barak iha nia laran hetan diak. ³⁷Hafoin ema hotu iha rai Gerasa tauk tebetes, hodi husu Jezús atu husik sira, basa sira tauk liu. Tan ne’e, Nia sa’e ba ro atu fila fali. ³⁸Ema husi ne’ebé diabu sira sai husu Jezús atu husik nia la’o hamutuk ho Nia. ³⁹Maibé Jezús haruka nia, dehan: “Fila ba uma, hodi haktuir buat hotu ne’ebé Maromak halo tiha ba o.” Ema ne’e ba duni, hodi fo sai iha sidade tomak buat hotu ne’ebé Jezús halo ba nia.

Feto moras fakar ran no Jairo nia oan feto

⁴⁰Wainhira Jezús fila mai, ema lubun boot simu Nia; basa sira hotu hein Nia. ⁴¹Ema ida naran Jairo, sinagoga nia ulun ida, mai hasoru Nia. Monu tiha ba Jezús nia ain, ema ne’e husu Nia atu ba nia uma, ⁴²basa nia iha oan feto mesak ne’ebé besik tinan sanulu resin rua, moras besik atu mate. Tuir dalan, ema barak hale’u hodi hanehan Nia. ⁴³Iha feto ida ne’ebé moras fakar ran tinan sanulu resin rua ona. Nia gasta nia osan tomak ba doutor sira, maibé ema ida la bele fo isin diak ba nia. ⁴⁴Nia mai husi kotuk, hodi kona Jezús nia unuk nia ninin. Iha oras ne’e kedas nia hetan isin diak. ⁴⁵Jezús dehan: “Se mak kona Ha’u?” Tan sira hotu heli lia, Pedro ho nia maluk sira dehan: “Ema lubun boot hale’u hodi dudu Ita!” ⁴⁶Jezús dehan teni: “Ema ida kona Ha’u. Ha’u hatene, basa kbiit sai husi Ha’u.” ⁴⁷Haree katak nia la bele subar, feto ne’e hakbesik Jezús, nakdedar ho tauk; hafoin, monu tiha ba Nia ain, feto ne’e haktuir iha povu tomak nia oin tansa nia kona Jezús no oin sa nia hetan isin diak iha oras ne’e kedas. ⁴⁸Jezús dehan: “Ha’u nia oan feto, o nia fiar mak soi o. Ba ho dame!” ⁴⁹Nia sei koalita hela, ema ida to’o mai husi na’i ulun sinagoga nian nia uma, dehan: “Ita nia oan feto mate ona. Lalika hakole tan Mestre.” ⁵⁰Maibé, rona tiha lia ne’e, Jezús dehan ba nia: “Keta tauk, fiar de’it no nia sei sai diak fali.” ⁵¹To’o tiha uma, Jezús la husik ema ida tama hamutuk ho Nia, maibé Pedro, João no Tiago de’it, hamutuk ho labarik nia aman no inan. ⁵²Sira hotu tanis hodi hakilar, maibé Jezús dehan: “Keta tanis, nia la mate, nia toba de’it.” ⁵³Sira hamnasa Nia, basa sira hatene katak labarik mate ona. ⁵⁴Maibé Jezús kaer nia liman hodi dehan: “Labarik, hamriik ba!” ⁵⁵Nia kllamar fila fali, nia hamriik kedas. Jezús haruka sira fo han ba nia. ⁵⁶Nia aman inan sira hakfodak, maibé Jezús bandu sira atu la bele fo sai ba ema ida buat ne’ebé mosu.

Jezús haruka apostolu sira

¹Jezús haruka sira na’in sanulu resin rua, hodi fo kbiit ba sira atu duni sai diabu sira no halakon moras sira. ²Nia haruka sira atu haklaken Maromak nia reinu, no mos atu fo isin diak ba ema moras sira. ³Nia dehan ba sira: “Keta lori buat ida iha dalan: ai-tonka ka kohe, paun ka osan ka hatais tahan rua. ⁴Iha uma naran de’it ne’ebé imi tama, hela iha ne’ebá to’o tempu ne’ebé imi atu sai. ⁵Kona ba sira ne’ebé la simu imi, wainhira imi husik fatin ne’ebá, liki rai rahun husi imi nia ain nu’udar sinal hasoru sira.” ⁶Nune’e sira sai hodi la’o ba knua sira, haklaken evangeliu no fo isin diak ba ema moras sira iha fatin hot-hotu.

Herodes ho João

⁷Rona tiha kona ba buat ne’e hotu, liurai Herodes hakfodak, basa ema balun dehan katak João moris hi’as ona husi mate; ⁸ema seluk dehan katak Elias mosu fali, ema seluk tan dehan katak profeta uluk sira ida moris hi’as fali. ⁹Maibé Herodes dehan: “Ha’u tesi tiha ona João nia ulun. Ne’e duni, ema ne’e se los, ne’ebé kona ba nia ha’u rona buat hirak ne’e?” No nia buka namanas atu haree Nia.

Jezús fo han ba ema lubun boot

¹⁰Wainhira apostolu sira fila fali, sira haktuir buat hotu ne’ebé sira halo. Jezús lori sira hamutuk ho Nia ba rai ida naran Betsaida, atu hela mesa-mesak. ¹¹Maibé wainhira ema barak hatene buat ne’e, sira ba tuir Nia. Jezús simu sira hodi koalita ba sira kona ba Maromak nia reinu. Hafoin Nia fo isin diak ba sira ne’ebé moras. ¹²Loron monu dau-daun ona. Sira sanulu resin rua hakbesik hodi dehan ba Nia: “Ita haruka ema lubun ne’e ba knua no ba uma sira ne’ebé besik atu buka aihan no fatin atu toba, basa rai ne’e mesa fuik.” ¹³Maibé Nia dehan ba sira: “Imi rasik mak fo han ba sira.” Sira hatán: “Ami iha de’it paun fuan lima no ikan oan rua; ami ba sosa karik aihan ba povu ne’e tomak mak bele sai los.” ¹⁴Mane sira de’it besik rihun lima ona. Jezús hateten ba nia eskolante sira: “Imi haruka sira tur hamutuk tiha, lima nulu lima nulu hamutuk.” ¹⁵Sira halo nune’e, hodi haruka sira hotu tur tiha. ¹⁶Jezús kaer paun fuan lima no ikan rua ne’e, foti matan ba lalehan, haraik bensa, silu hodi fo ba eskolante sira atu fahe ba ema lubun ne’e. ¹⁷Sira hotu han to’o bosu. Tuir mai, sira halibur hamutuk baluk oan sira ne’ebé resin, hodi hakonu luhu sanulu resin rua.

Pedro nia fiar

¹⁸Loron ida, wainhira Nia harohan mesa-mesak ho nia eskolante sira de’it, Jezús husu ba sira: ¹⁹“Ema dehan Ha’u se los?” Eskolante sira hatán: “João Baptista; balun dehan, Elias; balun fali dehan, profeta ida uluk nian mak moris hi’as.” ²⁰Jezús husu ba sira: “Imi rasik dehan Ha’u se loos?” Simão Pedro simu hodi dehan: “Ita Maromak-Nia Messias.” ²¹Nia bandu sira atu la bele fó sai buat ne’e ba ema ida, ²²dehan: “Oan Mane sei terus barak: katuas sira no eskriba sira sei hakribi Nia, hodi oho Nia; liu tiha loron tolu, Nia sei moris-hi’as.”

Liafuan ida ba sira ne’ebé hakarak tuir Jezús

²³Jezús dehan ba sira hotu: “Ema ruma hakarak tuir Ha’u karik, nia sei husik nia an rasik, simu nia krus loron loron nian hodi tuir Ha’u. ²⁴Basa ema ne’ebé hakarak soi nia moris, sei lakon moris ne’e; maibé ema ne’ebé lakon nia moris tanba Ha’u, sei soi nia moris. ²⁵Ema manan sa ida wainhira nia manan mundu tomak, maibé lakon nia klamar? ²⁶Ema ruma moe karik kona ba ha’u no ha’u nia hanorin, Oan Mane mos sei moe kona ba nia wainhira Nia sei mai iha nia gloria no iha gloria Aman no anju santu sira nian. ²⁷Tebes, Ha’u dehan ba imi: imi ne’ebé hamriik iha ne’e, balun sei la mate molok sira haree Maromak nia reinu.”

Jezús nakfila an

²⁸Loron ualu liu tiha Nia koalia liafuan hirak ne'e, Jezús lori Pedro, João no Tiago hamutuk no Nia, hodi sa'e ba foho ida atu harohan. ²⁹Nia sei harohan hela, nia oin nakfila an; nia unik nabilan teb-tebes. ³⁰Teki-teki mane na'i rua mosu mai, koalia ho Nia: sira mak Moises no Elias, ³¹ne'ebé mosu ho kmanek wa'in; sira koalia kona ba mate ne'ebé Nia sei hetan iha Jerusalem. ³²Pedro ho nia maluk sira matan dukur liu; maibé, hader tiha, sira haree nia gloria no mos mane na'in rua ne'ebé hela ho Nia. ³³Wainhira na'in rua ne'e sai dau-daun, Pedro dehan ba Jezús: "Mestre, diak tebes katak ita iha ne'e; husik ami halo taka balun tolu: ida ba Ita, ida ba Moises no ida ba Elias." Nia la hatene buat ne'ebé nia hateten. ³⁴Nia sei koalia hela, kalohan ida mosu mai hodi falun sira. Wainhira sira tama iha kalohan laran, sira tauk. ³⁵Husi kalohan, lia ida dehan: "Ida ne'e mak ha'u nia Oan doben; imi rona Nia ba!" ³⁶Lia ne'e koalia tiha, Jezús hela mesak. Eskolante sira nonok no iha loron hirak ne'ebá sira la dehan ba ema ida buat ne'ebé sira haree.

Labarik ne'ebé moras bibi-mate

³⁷Liu tiha loron ida, wainhira sira tun tiha husi foho, ema lubun boot ba hasoru sira. ³⁸Teki-teki, husi sira leet ema ida hakilar: "Mestre, ha'u husu ba Ita atu haree ha'u nia oan mane: nia mak ha'u nia oan mesak. ³⁹Espiritu aat ida tama iha nia, hakilar fila fila hodi doko nia maka'as, halo nia ibun nakfurin; no la husik nia, hodi halo nia kbiit laek. ⁴⁰Ha'u husu ona Ita nia eskolante sira atu duni sai nia, maibé sira la bele." ⁴¹Jezús simu, dehan: "Ema laran aat no fiar laek! To'o wainhira Ha'u sei hela hamutuk ho imi, hodi tahan imi? Lori o nia oan mai!" ⁴²Wainhira labarik hakbesik, diabu soe nia ba rai hodi doko nia. Maibé Jezús si'ak espiritu aat ne'e, fo isin diak ba labarik, hodi fo fali nia ba nia aman.

Jezús koalia ba dala rua kona ba nia mate

⁴³Ema hotu hakfodak ho Maromak nia kmanek. Maibé wainhira povu sira hakfodak ho buat ne'ebé Jezús halo tiha, Nia dehan ba nia eskolante sira: ⁴⁴"Rona di-diak liafuan hirak ne'e: sira sei saran Oan Mane ba ema sira liman." ⁴⁵Maibé sira la komprende lia ne'e katak sa, hanesan buat ida taka metin sira neon; no sira tauk atu husu kona ba buat ne'e.

Se mak boot liu

⁴⁶Tuir mai sira hahu hakesuk malu kona ba se mak boot liu. ⁴⁷Hatene tiha sira nia hanoin, Jezús kaer labarik ida, tau nia iha Nia sorin, ⁴⁸hodi dehan ba sira: "Ema ne'ebé simu labarik ne'e iha Ha'u nia naran, simu Ha'u; no ema ne'ebé simu Ha'u, nia simu Ida ne'ebé haruka Ha'u mai. Basa ida ne'ebé kiik liu iha imi nia leet, nia mak boot liu."

⁴⁹João hahu koalia, dehan: "Mestre, ami haree ema ida ne'ebé duni sai diabu iha Ita nia naran maibé ami bandu nia, basa nia la tuir Ita." ⁵⁰Maibé, Jezús hateten ba nia: "Imi keta bandu nia, basa ema ne'ebé la hasoru imi, nia hamutuk ho imi."

Samaritanu sira la simu Jezús

⁵¹Wainhira tempu atu husik rai ne'e besik dau-daun ona, Jezús, hodi hakarak, hahu la'o ba Jerusalem. ⁵²Nia haruka manu-ain sira atu ba uluk. Sira ne'e la'o ba, hodi tama iha ema Samaria sira nia knua ida, atu hadia fatin ba Nia. ⁵³Maibé sira la simu Nia basa Nia sa'e ba Jerusalem. ⁵⁴Haree tiha ne'e, eskolante sira, Tiago no João, dehan ba Nia: "Na'i, Ita hakarak ami hamulak atu ahi tun husi lalehan, hodi han sira?" ⁵⁵Maibé Nia fila oin hodi si'ak sira. ⁵⁶Tuir mai, sira la'o fali ba knua seluk.

Susar atu tuir Jezús

⁵⁷Tuir dalan ema ida dehan ba Nia: "Ha'u sei la'o tuir Ita ba fatin hotu!" ⁵⁸Jezús hatán ba nia, "Asu fuik iha luhan, manu sira iha lalehan iha knuuk; maibé Oan Mane la iha fatin atu hatoba nia ulun." ⁵⁹Ba ida seluk Nia dehan: "O Tuir Ha'u mai!" Maibé ema ne'e simu: "Na'i, husik ha'u ba hakoi lai ha'u nia aman." ⁶⁰Jezús hatán ba nia: "Husik matebian sira hakoi matebian sira; maibé o fali, ba hodi haklaken Maromak nia reinu." ⁶¹Ema seluk dehan, "Ha'u sei tuir Ita, Na'i; maibé husik ha'u despede lai ho sira ne'ebé iha ha'u nia uma laran." ⁶²Jezús hatán ba nia, "Ema ne'ebé tau ona liman ba sarua, hafoin fila oin ba kotuk, nia la soi ba Maromak nia reinu."

10

Jezús haruka eskolante na'in hitu nulu resin rua

¹Tuir mai, Nia fihir eskolante hitu nulu resin rua, hodi haruka sira rua rua atu ba uluk iha sidade no fatin sira ne'ebé Nia atu ba. ²Nia dehan ba sira: "To'os boot duni, maibé serbisu na'in sira uitoan de'it. Tan ne'e, imi husu ba to'os na'in atu haruka serbisu na'in sira ba nia to'os. ³Imi la'o ba. Ha'u haruka imi ba nu'udar bibi oan sira iha asu fuik sira leet. ⁴Keta lori bukae, kohe eh sandalias. Keta kumprimenta ema ida iha dalan. ⁵Imi tama karik iha uma ida, uluk knanain imi dehan: 'Dame ba uma ne'e!' ⁶Iha karik ema dame na'in ida iha ne'ebá, imi nia dame sei horik ho nia; lae karik, sei fila fali ba imi. ⁷Imi hela iha uma ne'ebá, han hemu buat ne'ebé sira iha; basa serbisu na'in soi atu simu nia kolen. Keta tama uma sai uma sira. ⁸Imi tama iha sidade ida no sira simu imi karik, imi han buat ne'ebé sira fo ba imi. ⁹Fó isin diak ba ema moras sira iha ne'ebá, hodi hateten ba sira: 'Maromak-Nia reinu besik ona imi.' ¹⁰Maibé imi tama iha sidade ida no sira la simu imi karik, imi sai ba luron sira hodi dehan: ¹¹'Rai rahun mos husi imi-nia sidade, ne'ebé belit ba ami nia ain, ami liki tiha ba imi! Maibé imi hanoin hela ba katak Maromak nia reinu besik liu ona.' ¹²Ha'u dehan tebes ba imi katak aban bainrua Sodoma sei la hetan susar hanesan sidade ne'e."

¹³"Rahun aat ba o, Korosain! Rahun aat ba o, Betsaida! Basa, milagre sira ne'ebé halo tiha iha o halo karik iha Tiro no Sidon, kleur ona mak sira hakribi sira nia sala hodi hatais karon no tur iha ahi kdesan leten. ¹⁴Maibé iha loron tesi lia nian, Tiro no Sidon sei la hetan susar hanesan imi. ¹⁵O mos, Kafarnaum, hakarak foti an to'o lalehan? Ema sei hamonu o to'o inferno!"

¹⁶"Ema ne'ebé rona imi rona Ha'u, no ema ne'ebé hakribi imi hakribi Ha'u; maibé ema ne'ebé hakribi Ha'u, hakribi Ida ne'ebé haruka Ha'u mai."

¹⁷Sira hitu nulu resin rua ne'e fila fali hodi haksolok, dehan: "Na'i, diabu sira mós tuir ami hodi Ita-Nia naran." ¹⁸Nia hatán ba sira: "Ha'u foin haree Satanas monu husi lalehan hanesan rai lakan. ¹⁹Loos duni, Ha'u haraik tiha kbiit ba imi atu sama samea, ho sakunar sira, hodi manan hasoru funubulun-nia kbiit tomak; la iha buat ida ne'ebé bele halo aat imi. ²⁰Maski nune'e, keta haksolok tanba espiritu sira tuir imi; haksolok de'it tanba imi nia naran hakerek tiha ona iha lalehan."

Jezús nia ksolok

²¹Iha oras ne'ebá Nia haksolok teb-tebes ho Espiritu Santu, dehan: "Ha'u hanai Ita, Aman, basa Ita subar tiha buat sira ne'e husi ema matenek sira hodi fo hatene fali ba sira ne'ebé kiik. Los duni, Aman, Ita hakarak nune'e. ²²Ha'u nia Aman saran tiha buat hotu mai Ha'u. Ema ida la hatene se mak Oan, Aman de'it mak hatene; no ema ida la hatene se mak Aman, Oan de'it mak hatene, no ida ne'ebé Oan hakarak fo hatene ba nia." ²³Hafoin, fila oin ba nia eskolante sira, Nia dehan: "Rahun diak ba sira ne'ebé haree buat ne'ebé imi haree. ²⁴Basa Ha'u dehan ba imi katak profeta no liurai sira uluk nian hakarak haree buat ne'ebé imi haree, maibé sira la haree; no rona buat ne'ebé imi rona, maibé sira la rona."

Aiknanoi kona ba Samaritanu diak

²⁵Tuir mai, doutor ukunfuan nian ida hamriik hodi dehan atu koko Nia: "Mestre, ha'u sei halo sa ida atu hetan moris rohan laek?" ²⁶Jezús dehan ba nia: "Iha ukunfuan hakerek sa ida? Ita lee oin sa?" ²⁷Nia hatán: "O sei hadomi Na'i, o nia Maromak, ho neon ho laran tomak, ho o nia kbiit tomak, ho o nia hanoin tomak; no mos o nia maluk nu'udar o nia an rasik." ²⁸No Jezús dehan ba nia: "Ita hatán los; halo nune'e, ita sei hetan moris." ²⁹Maibé, tan nia hakarak souri an, nia dehan ba Jezús: "Maibé, se mak ha'u nia maluk?" ³⁰Jezús hatán hodi dehan: "Ema ida tun husi Jerusalem ba Jeriko. Nia monu iha na'okten sira

nia liman. Sira hadau nia sasan sira hodi baku tasak nia; hafoin sira halai, hodi husik hela nia besik atu mate. ³¹Am'lulik ida liu husi ne'ebá; haree tiha ema ne'e, nia liu ba oin de'it. ³²Nune'e mos levita ida ne'ebé liu husi ne'ebá: haree tiha ema ne'e, nia liu ba oin. ³³Maibé, wainhira Samaritanu ida liu husi ne'ebá, haree tiha ema ne'e, nia hanoin nia teb-tebes. ³⁴Nia hakbesik, tau mina ho tua ba nia kanek sira hodi falun sira, hafoin foti ema ne'e ba nia kuda rasik no lori nia ba uma ida hodi bali nia. ³⁵Liu tiha loron ida nia hasai osan rua, hodi fo ba uma na'in, dehan: 'Haree nia di-diak, no buat ne'ebé ita gasta ha'u sei selu wainhira ha'u sei fila mai.' ³⁶Tuir ita nia hanoin, sira na'in tolu ne'e, ida ne'ebé mak maluk ba ema ne'ebé monu iha na'okten sira nia liman?' ³⁷Nia hatán: "Ida ne'ebé hatudu laran luak ba nia." No Jezús hateten ba nia: "Ba, hodi halo mos nune'e."

Marta no Maria

³⁸Tuir dalan, Jezús to'o knua ida. Feto ida naran Marta simu Nia iha nia uma. ³⁹Marta iha feton ida naran Maria, ne'ebé tur de'it iha Jezús nia ain hodi rona Nia koalia. ⁴⁰Marta fali, ne'ebé la'o ba la'o mai atu serbi sira, hakbesik hodi dehan: "Na'i, Ita la haree katak ha'u nia alin husik ha'u serbisu mesa-mesak? Dehan to'ok ba nia atu tulun ha'u." ⁴¹Na'i hatán ba nia: "Marta, Marta, o la'o kole hodi hanoin resin kona ba buat barak; maibé buat ida de'it mak folin los. ⁴²Maria hili buat ne'ebé diak liu hotu, ne'ebé ema ida sei la hadau husi nia."

11

Jezús hanorin atu hamulak

¹Loron ida, Nia harohan iha fatin ida. Hotu tiha, nia eskolante ida hateten ba Nia: "Na'i, hanorin ami harohan hanesan João Baptista hanorin nia eskolante sira." ²Nia dehan ba sira: "Wainhira imi harohan, hateten nune'e: 'Aman, tulun ema atu hahi Ita naran. Halo Ita nia reinu to'o mai ami. ³Haraik aihan loron-loron nian mai ami. ⁴Haraik perdua mai ami sala, nu'udar ami perdua ema ne'ebé halo aat ami. Label husik ami monu ba babeur.'" ⁵Nia dehan tan ba sira: "Imi ida iha karik belun ida ne'ebé iha kalan boot ba hateten ba nia: ⁶'Belun, fo netik paun fuan tolu mai, basa ha'u nia belun foin to'o mai husi dook no ha'u la iha buat atu fo ba nia.' ⁷Belun ne'e bele hatán husi uma laran: 'Keta hasusar ha'u! Odamatan taka metin ona. Ha'u ho ha'u nia oan sira toba tiha ona. Ha'u la bele hader atu fo buat rumu ba o.' ⁸Ha'u dehan ba imi katak, maski nia sei la hader hodi fo tanba sira belun malu, nia sei fo duni buat hotu ne'ebé nia belun kuran tanba nia husu fila fila. ⁹Ne'e duni, Ha'u dehan ba imi: husu ba, imi sei simu; buka ba, imi sei hetan; tuku odamatan ba, odamatan sei nakloke ba imi. ¹⁰Basa ema hotu ne'ebé husu, sei simu; ema ne'ebé buka sei hetan; no odamatan sei nakloke ba ema ne'ebé tuku. ¹¹Iha imi leet, aman ida ne'ebé sei fo fatuk ida wainhira nia oan husu paun? Eh sei fo samea ida wainhira nia husu ikan? ¹²Eh sei fo sakunar ida wainhira nia husu mantolu? ¹³Ne'e duni, imi hatene fo buat diak ba imi nia oan sira, maski imi ema aat, imi nia Aman iha lalehan sei haraik liu tan Espiritu Santu ba sira ne'ebé husu ba Nia."

Fariseu sira duu matak Jezús

¹⁴Jezús duni sai dau-daun diabu ida ne'ebé monok. Wainhira diabu sai tiha, ema monok koalia hodi halo povu tomak hakfodak. ¹⁵Maibé balun dehan: "Nia duni sai diabu hodi Beelzebu, diabu sira nia ulun nia naran." ¹⁶Balun fali husu ba Nia sinal ida husi lalehan, atu koko Nia. ¹⁷Maibé, hatene tiha sira nia hanoin, Nia dehan ba sira: "Reinu hotu ne'ebé haketak malu sei sobu rahun, uma ida sei monu iha uma seluk nia leten. ¹⁸Nune'e mos, Satanas fahe karik nia an ba rua, oin sa nia bele tahan? Basa imi dehan katak hodi Beelzebu mak Ha'u duni sai diabu sira. ¹⁹Ha'u duni sai diabu sira hodi Beelzebu nia naran karik, hodi se nia naran mak imi nia oan sira duni sai sira? Tan ne'e mak sira sei tesi lia ba imi. ²⁰Maibé Ha'u duni sai diabu sira hodi Maromak nia liafuan karik, ne'e dehan katak Maromak nia reinu to'o ona ba imi. ²¹Wainhira ema maka'as ida ho kroat hein nia uma boot, nia rikusoi hela metin; ²²maibé wainhira ema ida maka'as liu nia mosu karik hodi manan nia, ema ne'e hadau nia kroat ne'ebé fo laran metin ba nia, hodi fahe nia sasan tomak. ²³Ida ne'ebé la hamutuk ho Ha'u, nia hasoru Ha'u; no ida ne'ebé la halibur ho Ha'u, nia sei namkari. ²⁴Wainhira espiritu foer ida sai husi ema ida, nia la'o lemo rai fuik maran hodi buka hakmatek. La hetan tiha, nia dehan: 'Ha'u sei fila fali ba uma ne'ebé ha'u hela uluk.' ²⁵To'o tiha ne'ebá, nia hetan fatin ne'e saar mos tiha no furak. ²⁶Hafoin nia ba lori tan espiritu na'in hitu ne'ebé aat liu fali nia; sira ne'e tama, hodi horik iha ne'ebá. Iklus mai ema ne'e sai aat liu fali uluk nian."

Rahun diak lo-los

²⁷Nia sei koalia hela, feto ida husi ema lubun sira leet foti lia, dehan: "Rahun diak ba knotak ne'ebé ko'us Ita, no hirus matan ne'ebé fo susuben ba Ita!" ²⁸Maibé Nia hatán: "Rahun diak liu fali ba sira ne'ebé rona Maromak futar lia hodi halo tuir nia!"

Jonas nia sinal

²⁹Wainhira ema sira sai wa'in liu tan, Nia dehan: "Ema sira otas ne'e nian aat duni; sira husu sinal ida, maibé sinal mesak ne'ebé sei fo ba sira mak sinal Jonas nian. ³⁰Basa, hanesan Jonas sai sinal ida ba ema rai Ninive, nune'e mos Oan Mane sei sai sinal ida ba ema sira husi otas ne'e. ³¹Iha loron tesi lia nian liurai feto tasimane nian sei hamriik hasoru ema sira ne'e hodi tesi lia todan ba sira; basa nia mai husi mundu nia rohan atu rona Salomao nia matenek, no iha ne'e iha Ida ne'ebé boot liu fali Salomao. ³²Iha loron tesi lia nian Ninive nia oan sira sei hamriik hasoru ema sira ne'e, hodi tesi lia todan ba sira; basa wainhira Jonas haklaken Maromak nia liafuan, sira hakribi sira nia sala, maibé iha ne'e iha Ida ne'ebé boot liu fali Jonas."

Aiknanoi kona ba ahi-oan

³³"Ema ida la sunu lakan ahi-oan atu tau nia iha uma okos, eh iha balde nia okos, maibé atu tau iha nia fatin, atu sira ne'ebé tama bele haree nia naroman. ³⁴O nia isin nia ahi-oan mak o nia matan. O nia matan mos karik, o nia isin tomak iha naroman; maibé o nia matan moras karik, o nia isin tomak iha nakukun laran. ³⁵Ne'e duni, haree ba atu o nia naroman la sai nakukun. ³⁶O nia isin tomak hetan karik naroman no la iha nakukun iha nia, isin tomak ne'e sei nabilan, hanesan ahi-oan ne'ebé leno o ho nia naroman."

Hasoru fariseu sira

³⁷Jezús sei koalia hela, fariseu ida konvida Nia atu han iha nia uma. Nia tama hodi tur iha meja. ³⁸Fariseu hakfodak, basa Nia la fase an molok atu han. ³⁹Na'i dehan ba nia: "Imi fariseu sira hamos kopu no bikan nia liur, maibé imi nia laran mesa karakteren no aat. ⁴⁰Beikten sira! Ida ne'ebé halo buat ne'ebé iha liur, la halo mos buat ne'ebé iha laran? ⁴¹Imi fo esmola husi imi nia rikusoi, no buat hotu sei sai mos ba imi. ⁴²Maibé rahun aat ba imi, fariseu sira, ne'ebé selu impostu ruku nian, salsa no modo tomak nian, maibé haluha justisa no domin ba Maromak! Imi sei halo duni buat ne'e, maibé keta haluha buat seluk. ⁴³Rahun aat ba imi, fariseu sira, ne'ebé gosta tur iha fatin uluk iha sinagoga no haksolok wainhira ema kumprimenta imi iha basar. ⁴⁴Rahun aat ba imi, basa imi hanesan rate sira ne'ebé ema la haree no ema sama tanba sira la hatene!"

⁴⁵Doutor ukunfuan nian ida simu hodi dehan: "Mestre, wainhira Ita koalia hanesan ne'e, Ita hateten aat mos ami." ⁴⁶Nia hatán: "Rahun aat mos ba imi, doutor ukunfuan sira nian, basa imi tau naha todan liu ba ema, maibé imi rasik la book liman fuan ida atu foti nia. ⁴⁷Rahun aat ba imi ne'ebé hada rate profeta sira nian: imi nia bei-ala sira mak oho sira! ⁴⁸Nune'e imi fo sasin, hodi hakarak mos imi nia bei-ala sira nia hahalok sira; basa sira mak oho, imi mak hada rate. ⁴⁹Tan ne'e Maromak nia matenek dehan: 'Ha'u sei haruka profeta no apostolu sira; balun sira sei duni sai no oho,' ⁵⁰atu ema otas ne'e nian sei hatán kona ba profeta sira hotu nia ran, ne'ebé nakfakar houri mundu hahu, ⁵¹husi Abel nia ran to'o Zacarias nian, ne'ebé ema oho iha altar no santuariu nia klanan. Tebes, Ha'u dehan ba imi, ema sira ne'e sei hatán kona ba buat hirak ne'e hotu. ⁵²Rahun aat ba imi, doutor ukunfuan sira nian, ne'ebé hadau tiha siabe matenek nian! Imi rasik la tama, no imi taka netik dalan ba sira ne'ebé hakarak tama."

⁵³Wainhira Nia sai husi ne'ebá, eskriba no fariseu sira hahu haksesuk maka'as ho Nia, hodi koko halo Nia koalia kona ba buat barak. ⁵⁴Sira buka atu halo Nia sidi ho nia liafuan atu nune'e bele duu Nia.

12

Jezús hanorin aten berani

¹Tuir mai, wainhira ema lubun boot teb-tebes halibur an hamutuk to'o sira hanehan malu, Jezús hahu koalía ba nia eskolante sira, dehan: "Imi matan moris ba kona ba fariseu nia fermentu, katak sira nia laran makerek. ²Buat hotu ne'ebé taka hela, sei nakloke; no buat hotu ne'ebé subar hela, sei fo hatene. ³Tan ne'e, buat ne'ebé imi dehan iha nakukun laran, ema sei rona iha laron nabilan; no buat hotu ne'ebé imi hateten nei-neik iha subar fatin, ema sei fo sai maka'as iha uma nia kakuluk. ⁴Ha'u nia belun sira, Ha'u dehan ba imi: keta tauk sira ne'ebé oho isin, hafoin la bele halo buat ida tan. ⁵Ha'u sei dehan ba imi se los mak imi ten ke tauk: imi sei tauk ida ne'ebé, oho tiha isin, iha mos kbiit atu soe ema ba infernu. Ha'u dehan ba imi, ema ne'e mak imi ten ke tauk. ⁶Ema la faan manulin lima ho osan rua? Maibé Maromak la hahu sira ne'e ida mos. ⁷Fuuk lahan husi imi nia ulun sura tiha hotu; ne'e duni, imi keta tauk, basa imi folin liu manulin barak. ⁸Ha'u dehan los ba imi katak ema ne'ebé hatene Ha'u iha ema nia oin, Oan Mane mos sei hatene nia iha Maromak nia anju sira nia oin. ⁹Maibé ema ne'ebé heli lia kona ba Ha'u iha ema nia oin, Maromak nia anju sira mos sei heli lia kona ba nia. ¹⁰Ema ne'ebé koalía aat hasoru Oan Mane, sei hetan perdua; maibé ema ne'ebé hateten aat Espiritu Santu sei la hetan perdua. ¹¹Wainhira sira lori imi ba sinagoga sira, ba tési lia na'in no ba na'i ulun sira, keta hanoin resin kona ba oin sa imi sei hatán eh koalía, ¹²basa iha oras ne'ebá Espiritu Santu sei hanorin imi buat ne'ebé imi sei dehan."

Keta hanoin resin rikusoí

¹³Husi ema lubun boot, ema ida dehan ba Nia: "Mestre, hateten ba ha'u nia maun atu fahe ami nia liman rohan." ¹⁴Nia hatán: "Belun, se mak foti Ha'u atu tési lia kona ba imi?" ¹⁵Hafoin Nia dehan ba sira: "Imi haree ba, keta kaan rikusoí, basa, la'os ema nia rikusoí mak halo ema moris liu." ¹⁶Tuir mai, Nia haktuir ba sira aiknanoik ida ne'e: "Ema riku ida hetan aihan barak husi nia to'os. ¹⁷Nia hanoin hodi dehan ba nia an: 'Ha'u sei halo sa los? Basa ha'u fatin la iha atu rai ha'u nia aihan sira.' ¹⁸Hafoin nia dehan: 'Ha'u sei halo nune'e: ha'u sei sobu ha'u nia aihan fatin hodi harii ida seluk boot liu fali ida ne'e; iha ne'ebá ha'u sei rai ai-fuan hotu to'os nian ho ha'u nia rikusoí tomak. ¹⁹No ha'u sei dehan ba ha'u nia klamar: 'Ha'u klamar, o iha sasan barak ne'ebé rai hela ba tinan wa'in; hakmatek ba, han hemu hodi haksolok ba.' ²⁰Maibé Maromak dehan ba nia: 'Beikten! Iha kalan ne'e kedas Ha'u sei bolu o nia klamar; sasan sira ne'ebé o rai hela sei sai se nian?' ²¹Nune'e mos sei mosu ba ema ne'ebé rai hela rikusoí ba nia an, maibé la sai riku iha Maromak nia oin."

Laran metin ba Maromak

²²Tuir mai Nia dehan ba nia eskolante sira: "Tan ne'e mak Ha'u dehan ba imi: keta hanoin resin kona ba imi nia moris, no buat ne'ebé imi sei han, eh kona ba imi nia isin no oin sa imi sei hatais. ²³Basa moris folin liu fali aihan, no isin folin liu fali hatais. ²⁴Haree ba manu lakateu sira: sira la kuda eh sohi, sira uma la iha atu rai aihan, no Maromak fo han sira. Maibé imi folin boot liu fali manu sira! ²⁵Imi ida ne'ebé, hodi hanoin resin, bele halo nia moris naruk liu? ²⁶Ne'e duni, imi la bele halo buat ne'ebé kiik liu karik, tan sa imi hanoin resin kona ba buat seluk? ²⁷Hanoin ba, oin sa ai-funan sira sai boot: sira la serbisu, sira mos la soru; maibé ha'u dehan ba imi katak Salomao mos, ho nia gloria tomak, la hatais hanesan sira ne'e ida. ²⁸Ne'e duni, Maromak ne'ebé fo hatais ba du'ut ne'ebé ohin buras iha to'os laran no aban ema soe ba ahi, Nia sei hanoin liu tan imi, ema fíar kiik! ²⁹Imi keta hanoin resin kona ba buat ne'ebé imi sei han ka hemu, keta laran susar; ³⁰basa gentiu sira mak buka buat hirak ne'e hotu. Maibé imi nia Aman hatene katak imi kuran sasan hirak ne'e. ³¹Imi buka uluk knanain Maromak nia reinu, no buat seluk sei haraik mos ba imi."

³²Bibi oan sira, keta tauk, basa imi nia Aman hakarak haraik reinu ba imi. ³³Faan imi nia rikusoí hodi fahe nu'udar esmola. Imi halo kohe sira ne'ebé la lakon, rikusoí ne'ebé la mohu iha lalehan, iha ne'ebé na'okten la bele hakbesik no ular la bele han. ³⁴Basa iha fatin ne'ebé imi haloot imi nia rikusoí, iha ne'ebá mos imi nia fuan sei hela ba."

Neon moris hodi hein Na'i

³⁵"Kesi metin imi nia futukabun. Halo imi nia ahi-oan lakan nafatin. ³⁶Halo an hanesan ema sira ne'ebé hein sira nia na'in wainhira nia mai husi festa kaben nian, atu loke kedas odamatan iha oras ne'ebé nia to'o mai hodi tuku odamatan. ³⁷Rahun diak ba atan sira ne'ebé Na'i hetan hader hela wainhira nia to'o. Tebes, Ha'u dehan ba imi katak, nia sei kesi hena ba nia knotak, sei halo sira tur iha meja, hafoin Nia sei liu husi sira leet hodi serbi sira. ³⁸Nia to'o mai karik iha ronda rua ka tolu, hodi hetan sira nune'e, rahun diak ba sira. ³⁹Imi rona di-diak ba: uma na'in hatene karik tuku hira mak na'okten atu mai, nia sei la husik nia tama iha nia uma. ⁴⁰Imi hein hela ba, basa iha oras ne'ebé imi la hanoin kona, Oan Mane sei hiit an mai."

⁴¹Pedro dehan ba Nia: "Na'i, Ita haktuir aiknanoik ida ne'e ba ami de'it, ka ba ema hot-hotu?" ⁴²Jezús simu: "Se mak atan diak no matenek ne'ebé uma na'in haruka atu haree nia familia hodi fahe aihan ba sira tuir oras lo-los? ⁴³Rahun diak ba atan ne'ebé nia na'in hetan halo nune'e wainhira nia to'o mai. ⁴⁴Tebes, ha'u dehan ba imi katak nia sei fo knaar ba atan ne'e atu haree nia rikusoí tomak. ⁴⁵Maibé atan ne'e dehan karik ba nia an: 'Ha'u nia na'i kleur atu to'o mai,' hafoin hahu baku atan mane no feto sira, hodi han no hemu to'o lanu, ⁴⁶nia na'i sei to'o mai iha oras ne'ebé nia la hanoin, na'i sei haketak nia, hodi tau nia hamutuk ho ema aat sira. ⁴⁷Atan ne'ebé hatene nia na'i nia hakarak, maibé la hadia an hodi halo tuir buat ne'ebé nia husu, sei hetan kastigu boot. ⁴⁸Maibé atan ne'ebé la hatene, no halo buat ne'ebé soi kastigu, sei hetan kastigu kiik de'it. Ba ema ne'ebé simu barak, sei husu mos barak; no ema ne'ebé simu knaar boot, sei hatán mos kona ba buat boot."

Tan Jezús, ema sei haketak malu

⁴⁹Ha'u mai atu lori ahi ba raiklaran, no Ha'u hakarak teb-tebes ahi ne'e lakan duni. ⁵⁰Ha'u sei simu baptisnu ida, no Ha'u sei la hakmatek to'o buat ne'e mosu. ⁵¹Imi hanoin katak Ha'u mai atu lori dame ba raiklaran? Ha'u dehan ba imi katak lae; maibé atu halo ema haketak malu. ⁵²Basa, houri ohin ba oin, ema na'in lima iha uma laran, sira lia sei la tuir malu: na'in tolu hasoru na'in rua, na'in rua hasoru na'in tolu; ⁵³aman hasoru oan mane, oan mane hasoru aman; inan hasoru oan feto, oan feto hasoru inan; banin feto hasoru feto foun, feto foun hasoru banin feto."

Sinal sira otas nian

⁵⁴Nia dehan tan ba ema lubun boot: "Wainhira imi haree kalohan ida iha loromonu, imi dehan katak udan sei tau, no mosu duni nune'e. ⁵⁵Wainhira anin hu'u husi tasimane, imi dehan katak laron sei manas, no mosu duni nune'e. ⁵⁶Imi ema laran makerek sira! Imi hatene si'ik buat ne'ebé mosu iha lalehan no iha rai, nusa mak imi la hatene si'ik otas ne'e? ⁵⁷Tan sa imi la haree ho imi nia matan rasik buat ne'ebé los? ⁵⁸Ne'e duni, wainhira o ba tribunal hamutuk ho o nia funubalun, buka hadame malu ho nia iha dalan; keta halo nia lori o ba tési lia na'in, hafoin tési-lia na'in saran o ba guarda, no guarda hatama o iha dadur laran. ⁵⁹Ha'u dehan ba o katak o sei la sai husi ne'ebá to'o o selu hotu."

Hanorin kona ba hakribi sala

¹Iha laron ne'ebá ema mai fo hatene ba Nia kona ba ema Galileia sira ne'ebé Pilatos haruka kahur sira ran ho balada sira nia ran, ne'ebé sira hasa'e ba lulik. ²Jezús hatán ba sira: "Imi hanoin katak ema Galileia sira ne'e aat liu fali ema Galileia sira seluk tanba sira terus nune'e? ³Lae, Ha'u dehan ba imi; maibé imi la hakribi karik imi nia sala, imi mos sei mate hanesan sira. ⁴Hanesan mos sira sanulu resin ualu ne'ebé tore Siloe hanehan mate wainhira tore ne'e monu: imi hanoin katak sira aat liu fali sira seluk iha Jerusalem? ⁵Lae, Ha'u dehan ba imi; maibé imi la hakribi karik imi nia sala, imi hotu sei mate hanesan sira."

Aiknanoik ai figueira nian

⁶Nia dehan tan aiknanoik ida ne'e: "Ema ida kuda tiha ai figueira ida iha nia to'os. Laron ida nia ba buka nia ai-fuan, maibé la hetan. ⁷Tan ne'e, nia hateten ba to'os atan: 'Tinan tolu ona ha'u mai buka ai-fuan iha ai-hun ne'e, maibé la hetan ida. Tési tiha nia! Tansa nia susu leet rai bokur?' ⁸Maibé to'os atan hatán: 'Na'i, husik nia tinan ida ne'e tan, atu ha'u bele ke'e rai hadulas nia hun hodi tau mos rai metan. ⁹Tinan mai nia sei fo fuan karik, diak; lae karik, mak sei tési tiha nia.'"

Jezús fo isin diak iha loron Sabadu

¹⁰Iha loron Sabadu ida Jezús hanorin iha sinagoga. ¹¹Iha ne'ebá iha feto ne'ebé espíritu aat ida halo moras tinan sanulu resin ualu ona: nia la'o hakru'uk de'it, la bele hamriik los. ¹²Haree tiha nia, Jezús bolu nia hodi dehan ba nia: "Feto, o nia moras la iha ona." ¹³Hafoin Nia tau liman ba nia. Iha oras ne'e kedas, feto hamriik los hodi hahi Maromak. ¹⁴Maibé, na'i ulun sinagoga nian, hirus tanba Jezús fo isin diak iha loron Sabadu, dehan ba ema sira: "Iha loron neen atu serbisu; ne'e duni, imi mai iha loron hirak ne'e; keta mai iha loron Sabadu." ¹⁵Maibé Jezús hatán ba nia, dehan: "Laran makerek sira, imi la kore imi nia karau eh kuda husi nia luhan iha loron Sabadu, hodi lori nia ba hemu?" ¹⁶Ne'e duni, feto ne'e, Abraao nia oan, ne'ebé diabu kesi tinan sanulu resin ualu ona, la soi atu kore tiha mos iha loron Sabadu?" ¹⁷Dehan tiha nune'e, nia funubalun sira moe hotu, no povu tomak haksolok tanba hahalok kmanek sira ne'ebé Nia halo.

Aiknanoik mustarda musan no fermentu nian

¹⁸Hafoin Nia dehan: "Maromak nia reinu hanesan sa ida los, eh Ha'u sei tanesan nia ho sa ida los?" ¹⁹Nia hanesan mustarda musan ne'ebé ema ida hola hodi kuda iha nia to'os. Musan ne'e moris hodi sai ai-hun boot ida, manu sira husi lalehan mai tur iha nia sanak sira." ²⁰Nia dehan tan: "Ha'u sei tanesan Maromak nia reinu ho sa ida los?" ²¹Nia hanesan fermentu ne'ebé feto ida tau iha farina sasukat tolu, to'o masa tomak sa'e."

Odamatan klood

²²Jezús liu husi sidade no knua sira atu ba Jerusalem hodi hanorin. ²³Ema balun husu ba Nia: "Na'i, ema uitoan de'it mak sei hetan maksoin?" Nia hatán ba sira: ²⁴"Haka'as an atu tama liu husi odamatan klood, basa Ha'u dehan ba imi katak ema barak sei koko atu tama, maibé sei la biban. ²⁵Wainhira uma na'in hader hodi taka tiha ona odamatan, imi sei hamriik iha liur hodi tuku odamatan, dehan: 'Na'i, loke mai ami!' Nia sei hatán: 'Ha'u la hatene imi mai husi ne'ebé.' ²⁶Imi sei hahu dehan: 'Ami uluk han hemu hamutuk ho Ita boot, no Ita boot hanorin iha ami nia luron sira.' ²⁷Maibé Nia sei dehan ba imi: 'Ha'u la hatene imi mai husi ne'ebé. Sai tiha husi ha'u nia oin, imi hotu ne'ebé halo aat!' ²⁸Iha ne'ebá ema sei ruun nehan hodi tanis, wainhira imi sei haree Abraao, Isaac, Jacob no profeta sira hotu iha Maromak nia reinu, maibé ema sei duni sai imi ba liur. ²⁹Ema sei mai husi loromonu no lorosa'e, husi tasimane no tasifeto, no sira sei tur han iha Maromak nia reinu. ³⁰Sira ne'ebé ohin ikus sei sai uluk; no sira ne'ebé ohin uluk sei sai ikus fali."

Jezús sei mate iha Jerusalem

³¹Iha loron ne'ebá, fariseu balun mai hodi dehan ba Nia: "Sai tiha husi ne'e, basa Herodes hakarak oho Ita." ³²Nia hatán ba sira: "Imi la'o ba, hodi dehan ba asu fuik ne'e: 'Ha'u duni sai diabu sira, hodi fo isin diak ba ema ohin no aban; no bainrua ha'u nia knaar hotu ona. ³³Maibé ohin, aban no bainrua Ha'u sei tuir Ha'u nia dalan: basa profeta ida la bele mate iha Jerusalem liur. ³⁴Jerusalem, Jerusalem, ne'ebé oho profeta sira no tuda sira ne'ebé Na'i haruka ba o! Dala barak ona Ha'u buka atu halibur o nia oan sira, hanesan manu inan tau nia oan sira iha nia liras okos, maibé o lakohi! ³⁵Tebes, ema sei husik o nia uma ne'e mamuk. Maibé Ha'u dehan ba o katak o sei la haree tan Ha'u to'o loron ne'ebé o sei dehan: 'Rahun diak ba Ida ne'ebé mai hodi Na'i nia naran!'"

14

Milagre ida tan iha loron Sabadu

¹Iha loron Sabadu ida, Jezús tama iha fariseu boot ida nia uma atu han. Sira hotu hateke ba Nia. ²Ema moras ida mai hamriik iha nia oin. ³Jezús hateten ba ukun na'in no fariseu sira: "Iha loron Sabadu bele fo isin diak ba ema moras, ka lae?" ⁴Sira nonok de'it. Tuir mai, kaer tiha ema moras nia liman, Jezús fo isin diak ba nia hodi haruka nia ba. ⁵Hafoin nia dehan ba sira: "Iha imi nia leet, se mak la dada sai nia kuda burro ka nia karau ne'ebé monu iha be matan, maski iha loron Sabadu?" ⁶Sira la bele hatán buat ida kona ba ne'e.

Fatin uluk liu no ikus liu

⁷Haree tiha oin sa bainaka balun fihir tur fatin diak, Jezús haktuir ba sira aiknanoik ida ne'e. ⁸"Ema ruma konvida karik o ba festa kaben ida, keta tur iha meja ulun; keta uma na'in konvida ema boot liu o karik; ⁹hafoin, ema ne'ebé konvida imi na'in rua sei dehan ba o: 'Fo lai fatin ba ema ne'e.' Nune'e o sei moe boot, hodi ba tur iha fatin ikus liu. ¹⁰Maibé wainhira ema konvida o, ba tur iha fatin ikus liu; nune'e, wainhira ema ne'ebé konvida o to'o mai, nia sei dehan ba o: 'Belun, mai tur liu leten.' Nune'e ema hotu ne'ebé tur hamutuk iha meja sei hahi o. ¹¹Basa ema ne'ebé foti an, Na'i sei hatun nia; no ema ne'ebé haraik an, Na'i sei foti nia."

Fihir kiak sira

¹²Tuir mai Jezús dehan ba ema ne'ebé konvida Nia: "Wainhira o halo festa, keta konvida o nia belun sira, o nia maun alin sira, o nia parenti sira ka o nia maluk riku sira; keta sira ne'e konvida fali o, nune'e sira selu fali o. ¹³Maibé, wainhira o halo festa, konvida ema kiak sira, ema kbiit laek sira, ema ain aat sira no ema matan delek sira. ¹⁴O sei hetan ksolok, basa sira ne'e la iha buat ida atu selu fali o; o sei simu o nia kolen wainhira ema diak sira sei moris hi'as."

Aiknanoik festa boot nian

¹⁵Rona tiha buat ne'e, bainaka ida dehan ba Nia: "Rahun diak ba ema ne'ebé sei han ho Maromak iha nia reinu!" ¹⁶Jezús hatán ba nia: "Ema ida halo festa boot hodi konvida ema barak. ¹⁷Iha oras atu han nia haruka nia atan atu hateten ba sira: 'Mai ona, buat hotu hadia tiha ona.' ¹⁸Maibé sira hotu hahu dehan buat oi-oin. Ida uluk dehan ba nia: 'Ha'u foin sosa rai no ha'u sei ba haree nia; ha'u husu diskulpa.' ¹⁹Ida seluk dehan: 'Ha'u foin sosa karau par lima no ha'u sei koko sira; ha'u husu diskulpa.' ²⁰Ida seluk tan dehan: 'Ha'u foin kaben, tan ne'e ha'u la bele ba.' ²¹Atan ne'e fila fali hodi haktuir buat hirak ne'e ba nia na'in. Tuir mai, uma na'in hirus, hodi dehan ba nia atan: 'Sai lalais ba dalan no luron sira sidade nian, hodi lori mai iha ne'e ema kiak sira, ema kbiit laek, ema matan delek no ema ain aat sira.' ²²La kleur atan ne'e fila fali, hodi dehan ba nia: 'Na'i, buat ne'ebé Ita haruka, halo tiha ona, maibé fatin sei iha.' ²³Uma na'in dehan fali ba nia atan: 'Ba liu husi dalan no to'os sira hodi obriga ema atu tama, atu ha'u nia uma sai nakonu. ²⁴Basa ha'u dehan ba imi katak, husi sira ne'ebé ha'u konvida uluk, ida mos sei la koko ha'u nia festa.'"

Husik buat hotu atu tuir Jezús

²⁵Ema lubun boot la'o hamutuk ho Jezús. Nia fila oin hodi dehan ba sira: ²⁶"Ema ruma mai tuir Ha'u karik, maibé la hewai nia aman, inan, feen, oan sira, to'o nia moris rasik, ema ne'e la bele sai ha'u nia eskolante. ²⁷Ema ne'ebé la lori nia krus hodi tuir Ha'u, nia la bele sai ha'u nia eskolante. ²⁸Imi ida ne'ebé mak, atu halo uma aas ida, la tur uluk lai atu sura buat ne'ebé kuran, hodi haree nia iha osan ka lae atu halo to'o hotu? ²⁹Keta halo be, foin hahu harii, nia la iha kbiit atu halo to'o rohan. Hafoin sira ne'ebé haree, hahu hamoe nia, dehan: ³⁰"Ema ne'e hahu harii, maibé la bele halo to'o rohan!'"

³¹"Eh liurai ida ne'ebé mak ba funu hasoru liurai seluk, la tur uluk lai hodi hanoin di-diak nia bele ka lae ho de'it soldadu rihun sanulu ba hasoru ida ne'ebé mai hasoru nia ho soldadu rihun rua nulu? ³²La bele karik, wainhira ida seluk sei dook hela, nia haruka kedas manu-ain atu ba husu dame. ³³Nune'e mos imi hotu ne'ebé la husik imi nia rikuso'i tomak, la bele sai ha'u nia eskolante."

³⁴"Masin diak duni; maibé masin ne'e lakon nia mer karik, oin sa bele halo nia mer fali? ³⁵Ba rai no ba foer fatin mos la diak ona, maibé ema soe de'it ba liur. Ema ne'ebé tilun iha atu rona, rona ba!"

15

Bibi ne'ebé lakon

¹Publikano no maksalak sira hakbesik Jezús atu rona Nia. ²Fariseu no eskriba sira hamuu, dehan: “Ema ne’e simu maksalak sira hodi han hamutuk ho sira.” ³Tan ne’e, Nia haktuir ba sira aiknanoi id a ne’e: ⁴“Imi id a ne’ebé mak, iha karik bibi atus id a no lakon tiha id a, la husik sia nulu resin sia seluk iha rai fuik maran, hodi ba buka to’o hetan id a ne’ebé lakon?” ⁵Hetan tiha, nia tau bibi ne’e ho ksolok iha nia kbaas. ⁶To’o tiha uma, nia bolu belun no maluk sira, hodi dehan ba sira: ‘Haksolok ho ha’u ba, basa ha’u hetan fali ona ha’u nia bibi ne’ebé lakon.’ ⁷Ha’u dehan ba imi katak iha lalehan mos sei iha ksolok tanba ema maksalak id a ne’ebé hakribi nia sala, liu fali tanba ema diak sira nulu resin sia ne’ebé la kuran atu hakribi sala.”

Osan mean ne’ebé lakon

⁸“Eh feto id a ne’ebé mak, iha karik osan mean sanulu, lakon tiha id a, nia la sunu ahi-oan, dasa uma laran hodi buka di-diak to’o hetan osan ne’ebé lakon?” ⁹Hetan tiha, nia bolu nia belun no maluk sira, dehan: ‘Haksolok ho ha’u ba, basa ha’u hetan ona osan mean ne’ebé lakon.’ ¹⁰Ha’u dehan ba imi katak Maromak nia anju sira mos sei haksolok tanba ema maksalak id a ne’ebé hakribi sala.”

Oan ne’ebé soe hela uma

¹¹Nia dehan tan: “Ema id a iha oan mane na’in rua. ¹²Id a kiik dehan ba nia aman: ‘Aman, fo mai ha’u buat ne’e ha’u nian.’ Aman ne’e fahe tiha nia rikuso i ba sira. ¹³Liu tiha lora n ruma, oan kiik ne’e halibur nia rikuso i tomak, hodi ba rai dook id a; iha ne’ebá nia halo nabén nia rikuso i tomak, hodi moris aat liu. ¹⁴Nahas tiha nia sasan tomak, rai ne’ebá hamlaha boot. Nia mos hahu hetan susar. ¹⁵Tan ne’e nia ba serbisu ba ema rai na’in id a, ne’ebé haruka nia ba hein fahi iha nia to’os. ¹⁶Nia kaan atu han ai-fuan ne’ebé fahi sira han, maibé ema id a la husik. ¹⁷Nia hanoin, hodi dehan ba nia an: ‘Ha’u nia aman iha atan barak ne’ebé aihan la kuran; ha’u fali iha ne’e mate hamlaha. ¹⁸Ha’u sei hamriik hodi ba koalía ho ha’u nia aman, dehan: ‘Aman, ha’u sala hasoru lalehan no mos hasoru ita. ¹⁹Ha’u la soi ona atu ita bolu ha’u ita oan. Haree de’it ha’u nu’udar ita nia atan id a.’

¹⁹Nune’e, hamriik tiha, nia ba hasoru nia aman. ²⁰Nia sei dook hela, nia aman haree ona nia, hanoin teb-tebes nia, hodi halai ba hasoru nia, hakoak no rei nia. ²¹Nia dehan: ‘Aman, ha’u sala duni hasoru lalehan no mos hasoru ita; ha’u la soi ona atu ita haree ha’u nu’udar oan.’ ²²Maibé aman ne’e dehan ba nia atan sira: ‘Lori mai lalais unuk furak liu, hodi fo hatais nia; tau kadeli ba nia liman, sapatu ba nia ain. ²³Lori mai karau oan bokur id a atu oho. Ita sei han hemu hodi halo festa. ²⁴Basa ha’u nia oan id a ne’e mate tiha, maibé moris fali; nia lakon tiha, maibé hetan fali.’ No sira hahu halo festa.”

²⁵“Maibé oan boot sei hela iha to’os. Wainhira nia fila fali, hakbesik dau-daun uma, nia rona ema hananu no bidu. ²⁶Nia bolu atan id a, hodi husu buat ne’e sa id a los. ²⁷Atan ne’e hatán: ‘O nia alin to’o ona mai no o nia aman oho karau oan bokur, basa nia to’o ho isin diak.’ ²⁸Maun boot, laran nakali teb-tebes, lakohi tama. Tan ne’e, nia aman sai hodi hahu hamaus nia. ²⁹Maibé nia hatán, hodi dehan ba nia aman: ‘Tinan hira ona mak ha’u serbi ita, hodi halo tuir nafatin ita nia hakarak, maibé ita la dauk fo bibi oan id a mai ha’u atu halo festa ho ha’u nia belun sira. ³⁰Maibé, wainhira ita nia oan ne’e to’o mai, ne’ebé halakon tiha nia rikuso i tomak ho feto aat sira, ita oho karau oan bokur id a ba nia.’ ³¹Nia aman hatán ba nia: ‘Ha’u oan, o horik nafatin ho ha’u, no buat hotu ne’ebé ha’u nian, o nian mos. ³²Maibé ita sei halo festa duni hodi haksolok, basa o nia alin ne’e mate tiha, maibé moris fali; nia lakon tiha, maibé hetan fali.’”

16

Administrador aat

¹Nia dehan tan ba nia eskolante sira: “Ema riku id a iha emar id a atu haree nia sasan. Lora n id a nia rona katak ema ne’e halo lakon nia rikuso i. ²Tan ne’e nia bolu emar ne’e, hodi husu ba nia: ‘Sa id a mak ha’u rona kona ba o? Hatán lai kona ba o nia serbisu, basa houri ohin ba oin o la bele kaer tan serbisu ne’e.’ ³Ema ne’e hanoin iha nia laran: ‘Ha’u sei halo sa los, wainhira ha’u nia na’i hasai ha’u husi serbisu? Fila rai, ha’u la bele; husu esmola, ha’u moe. ⁴Ha’u hatene ona ha’u sei halo sa atu, husik tiha serbisu ne’e, ema seluk simu netik ha’u.’ ⁵Tuir mai nia bolu sira id a-id a ne’ebé debe nia na’i, hodi dehan ba id a uluk liu: ‘O debe hira ba ha’u nia na’i?’ ⁶Nia hatán: ‘Mina botil atus id a.’ Ema ne’e dehan fali: ‘Tur lalais, kaer o nia nota, hakerek lima nulu.’ ⁷Ba id a seluk nia husu: ‘O debe hira?’ Id a ne’e hatán: ‘Trigu karon atus id a.’ Nia dehan: ‘Kaer o nia nota, hakerek ualu nulu.’ ⁸Na’i hahi ema aat ne’e tan nia hatene moris. Basa mundu ne’e nia oan sira hatene moris ho nia maluk sira diak liu fali naroman nia oan sira. ⁹Ha’u dehan ba imi: halo belun sira ho osan aat atu, wainhira osan ne’e nahas tiha ona, sira sei simu imi iha reinu rohan laek. ¹⁰Ema ne’ebé halo di-diak knaar kiik, nia halo mos di-diak knaar boot. ¹¹Ne’e duni, imi la hatene karik kaer osan aat ne’e, se mak sei fo ba imi rikuso i los? ¹²Imi la haree di-diak karik ema seluk nia sasan, se mak sei saran ba imi imi rasik nia sasan? ¹³Atan id a la bele serbi na’i na’in rua: nia sei hakribi id a hodi hadomi id a seluk, ka nia sei tuir id a hodi hewai id a seluk. Imi la bele serbi Maromak no osan dala id a.”

Ukunfuan tuan no foun

¹⁴Fariseu sira, ne’ebé hadomi osan, rona buat hirak ne’e hotu hodi hamnasa Nia. ¹⁵Jezús dehan ba sira: “Imi mosu nu’udar ema diak iha ema sira nia oin, maibé Maromak hatene imi nia fuan. Basa buat ne’ebé iha folin boot ba ema sira, buat ne’e la folin buat id a ba Maromak. ¹⁶Ukunfuan no profeta sira hela de’it to’o João; houri tempu ne’ebá ema haklaken tiha ona Maromak nia reinu no ema hotu haka’as an hodi kbiit atu tama iha nia. ¹⁷Lalehan no rai sei mohu lalais liu fali ukunfuan baluk id a. ¹⁸Ema ne’ebé husik nia feen hodi hola fali ema seluk, nia sala adulteriu nian; no ema ne’ebé hola feto ne’ebé nia laen husik tiha, nia mos halo sala adulteriu nian.”

Ema riku karaktern

¹⁹“Ema riku id a hatais mesak mean furak ho kabas lahan lotuk. Lora n lora n nia halo festa boot. ²⁰Ema kiak id a naran Lazaro tur hela iha nia odamatan. ²¹Kiak ne’e hakarak hili etu mumun husi riku nia meja okos; asu sira belo nia kanek sira. ²²Lora n id a ema kiak ne’e mate, Maromak nia anju sira lori nia ba hamutuk ho Abraao. Ema riku ne’e mos mate, ema hakoi nia. ²³Terus barak iha infernu, ema riku foti matan hodi haree husi dook Abraao hamutuk ho Lazaro. ²⁴Iha oras ne’e nia hasa’e lia, dehan: ‘Ha’u aman Abraao, sadia atan ha’u! Haruka netik Lazaro atu habokon nia liman fuan iha be, hodi mai halo malirin ha’u nia nanal, basa ha’u terus la diak iha ahi ne’e!’ ²⁵Abraao hatán: ‘Oan, hanoin ba, o simu ona o nia diak iha o nia moris tomak; Lazaro fali simu mak susar de’it. Oras ne’e Lazaro hetan ksolok, o fali hetan terus boot. ²⁶Hafoin, husi ami ba imi mos rai kuak boot haketak ita: ami id a hakarak karik liu ba imi la bele, imi id a hakarak karik hakat mai ami mos la bele.’ ²⁷Ema riku ne’e hatán fali: ‘Ne’e sa, ha’u aman, ha’u husu barak ba ita atu haruka Lazaro ba ha’u nia uma, basa ha’u iha alin na’in lima; ²⁸atu fo hatene ba sira, atu sira keta mai tan fatin terus ne’e!’ ²⁹Abraao dehan ba nia: ‘Sira iha ona Moises no profeta sira: rona sira ba!’ ³⁰Maibé nia simu fali: ‘Lae, aman Abraao! Matebian ruma ba karik koalía ho sira, sira sei hakribi sira nia sala.’ ³¹Maibé, Abraao dehan: ‘Sira la se tilun karik ba Moises no profeta sira, maski matebian id a moris hi’as fali, sira mos sei la fiar.’”

17

Liafuan diak ruma

¹Jezús dehan tan ba nia eskolante sira: “Esemplu aat sira sei iha duni; maibé ema ne’ebé fo esemplu aat sei hetan kastigu. ²Kesi fatuk boot dulas batar nian id a ba nia kakorok hodi soe nia ba tasi, diak liu fali nia dada labarik kiik sira ne’e id a ba sala.”

³“Imi rona di-diak: o nia maluk id a halo sala karik, fo hatene ba nia; nia hakribi sala karik, perdua nia. ⁴Nia sala karik dala hitu hasoru o, no nia hateten dala hitu ‘Ha’u hakribi,’ perdua nia.”

⁵Apostolu sira hateten ba Na’i: “Haboot ami nia fiar!” ⁶Na’i hatán ba sira: “Imi nia fiar boot karik hanesan modo musan id a, imi bele dehan ba ai-hun ne’e: ‘Fokit o an husi ne’e, ba kuda o an iha tasi laran,’ nia sei halo tuir. ⁷Iha imi leet se mak, iha atan id a ne’ebé wainhira nia fila husi to’os sei dehan ba nia: ‘O mai lalais tur iha meja?’ ⁸Nia sei la dehan fali: ‘O ba tein,’ ka ‘O ba hatais lalais atu serbi meja wainhira ha’u han dau-daun; hafoin mak o sei tur han?’ ⁹Ema se los mak sei fo obrigadu ba nia atan tan atan ne’e halo tuir nia hakarak? ¹⁰Nune’e mos imi, wainhira imi halo tiha imi nia knaar tomak, hateten: ‘Ami atan folin laek, ami halo de’it ami nia obrigasaun.’”

Ema moras lepra na'in sanulu

¹¹Jezús liu husi Galileia no Samaria atu ba Jerusalem. ¹²Wainhira nia tama dau-daun ba knua ida, ema moras lepra na'in sanulu mai hasoru Nia. ¹³Husi dook sira hasa'e lia, dehan: "Jezús, mestre, sadia atan ami!" ¹⁴Haree tiha sira, Nia dehan ba sira: "Imi ba, hatudu imi an ba am'lulik sira." La'o toir dalan, sira hetan isin diak. ¹⁵Sira ida, haree katak nia isin diak fali ona, fila fali hodi hahi Maromak ho lia maka'as; ¹⁶nia monu ba Jezús nia ain, hakru'uk to'o rai, hodi agradese. Ema ne'e Samaritanu ida. ¹⁷Jezús dehan ba nia: "La'os ema na'in sanulu mak hetan isin diak? Sira na'in sia iha ne'ebé?" ¹⁸Ema ida la fila atu hahi Maromak, mak ema malae ne'e de'it?" ¹⁹Hafoin Nia dehan ba ema ne'e: "Hamriik, la'o ba! O nia fiar mak soi tiha o!"

Maromak nia reinu to'o ona

²⁰Fariseu sira husu ba Nia wainhira mak Maromak nia reinu sei to'o. Nia hatán ba sira: "Maromak nia reinu la mai hodi hatudu an. ²¹Ema ida la bele dehan: 'Mak ne'e,' eh 'Mak ne'ebá,' basa Maromak nia reinu iha ona imi nia laran."

Oan Mane nia loron

²²Tuir mai Nia dehan ba nia eskolante sira: "Loron sei to'o wainhira imi sei hakarak haree Oan Mane nia loron ida, no imi sei la haree. ²³Ema sei dehan ba imi: 'Nia mak ne'e,' eh 'Nia mak ne'ebá.' Imi keta ba, keta tuir. ²⁴Basa nu'udar rai lakan nabilan husi lalehan nia hun to'o nia rohan, nune'e mos sei mosu iha Oan Mane nia loron. ²⁵Maibé uluk knanain Nia sei terus boot, ema husi otas ne'e sei hakribi Nia. ²⁶Nu'udar mosu tiha ona iha Noe nia loron, nune'e mos sei mosu iha Oan Mane nia loron: ²⁷sira han hemu, mane sira hola feto, feto sira hola mane to'o loron ne'ebé Noe tama iha ro laran no udan tau maka'as ne'ebé hamout sira hotu. ²⁸Sei mosu mos hanesan iha Lot nia loron: sira han hemu dau-daun, sira sosa no faan, sira kuda no harii uma. ²⁹Maibé iha loron ne'ebé Lot sai tiha husi Sodoma, ahi no ensofre tun husi lalehan hodi oho sira hotu. ³⁰Nune'e mos sei mosu iha loron ne'ebé Oan Mane sei hatudu an. ³¹Iha loron ne'ebá, ema ne'ebé iha uma nia kakuluk keta tun atu hola nia sasan sira; nune'e mos ida ne'ebé iha to'os keta fila fali. ³²Imi hanoin fali Lot nia feen."

³³Ema ne'ebé hakarak soi nia moris, sei lakon moris ne'e; no ema ne'ebé lakon nia moris, sei soi nia moris ne'e. ³⁴Ha'u dehan ba imi katak iha kalan ne'ebá ema na'in rua sei toba iha fatin ida: sira sei lori ida, hodi husik ida seluk. ³⁵Feto na'in rua sei tuku batar hamutuk: sira sei lori ida, hodi husik ida seluk. ³⁶Sira simu, dehan: "Na'i, buat ne'e sei mosu iha los ne'ebé?" ³⁷Nia hatán ba sira: "Iha fatin ne'ebé isin mate hela, iha ne'ebá mos mak manu makikit sira sei halibur hamutuk."

18

Juis aat

¹Tuir mai, Nia haktuir ba sira aiknanoik ida, hodi hanorin katak ita sei harohan nafatin hodi la bele kole. ²Iha sidade ida iha tesi lia na'in ida ne'ebé la tauk Maromak, la respeita ema. ³Iha sidade ne'e mos iha feto faluk ida ne'ebé ba hasoru nia, dehan: 'Halo lai justisa hasoru ha'u nia maluk.' ⁴Dala barak ona mak nia lakohi rona. Maibé loron ida nia dehan ba nia an: 'Maski ha'u la tauk Maromak, no mos la respeita ema, ⁵tanba feto faluk ne'e fo bei-beik ulun moras mai ha'u, ha'u sei halo duni justisa atu nia la bele mai halo kole tan ha'u.' ⁶Imi rona di-diak buat ne'ebé tesi lia na'in aat ne'e dehan. ⁷Ne'e duni, Maromak sei la halo justisa ba sira ne'ebé Nia fihir, ne'ebé kalan loron hasa'e lia ba Nia, hodi halo sira hein kleur tan? ⁸Tebes, Ha'u dehan ba imi, Nia sei halo kedas justisa ba sira. Maibé wainhira Oan Mane sei fila hikis mai, Nia sei hetan fiar iha raiklaran ka lae?"

Fariseu no Publikanu

⁹Hafoin Nia haktuir tan aiknanoik ida ne'e ba ema balun ne'ebé foti an hodi hanoin katak sira ema santu, maibé hakribi ema seluk: ¹⁰Ema na'in rua sa'e ba templu atu harohan: ida ema fariseu, ida seluk ema publikanu. ¹¹Fariseu ne'e hamriik tiha, hodi harohan nune'e: 'Na'i Maromak, ha'u agradese Ita Boot, basa ha'u la'os hanesan ema seluk: sira mesak ema na'okten, kaanten, laran foer; ha'u la hanesan mos ema publikanu ne'e. ¹²Ha'u hadera an semana ida dala rua. Ha'u selu impostu husi ha'u nia rikuso tomak.' ¹³Publikano fali hamriik dook, la berani atu foti matan, maibé baku de'it nia hirus matan, dehan: 'Na'i Maromak, sadia atan ha'u, ema maksalak!' ¹⁴Tebes, Ha'u dehan ba imi katak ema ne'e fila ba uma los ona, ida seluk lae. Basa ema ne'ebé foti an, Na'i sei hatun nia; no ema ne'ebé haraik an, Na'i sei foti nia."

Jezús ho labarik sira

¹⁵Tuir mai, ema lori ba Nia kiik oan sira atu Nia tau liman ba sira. Haree tiha ne'e, eskolante sira haksi'ak ema sira ne'e. ¹⁶Maibé Jezús bolu sira, dehan: "Husik labarik sira hakbesik Ha'u; keta duni sira, basa Maromak nia reinu sira nian. ¹⁷Tebes duni, Ha'u dehan ba imi katak ema ne'ebé la simu Maromak nia reinu hanesan labarik ida, nia sei la tama iha ne'ebá."

Ema riku ne'ebé hakarak tuir Jezús

¹⁸Na'i ulun ida husu ba Nia: "Mestre diak, ha'u sei halo sa ida atu hetan moris rohan laek?" ¹⁹Jezús hatán ba nia: "Tansa o bolu Ha'u diak? Maromak mesak mak diak. ²⁰O hatene ukunfuan sira: keta oho ema, keta halo sala foer, keta na'ok, keta duu matak ema, respeitu o nia inan aman." ²¹Nia dehan: "Buat ne'e hotu ha'u halo tiha ona houri ha'u sei labarik." ²²Rona tiha ne'e, Jezús dehan ba nia: "Sei iha tan buat ida ba o: faan tiha o nia rikuso tomak, hodi fahe osan ba kiak sira; o sei hetan rikuso barak iha lalehan; hafoin o mai tuir Ha'u." ²³Rona tiha buat ne'e, nia neon kraik teb-tebes, basa nia iha rikuso barak. ²⁴Haree tiha nia neon kraik, Jezús dehan: "Susar tebes ba ema riku sira atu tama iha Maromak nia reinu! ²⁵Basa kuda kamelu ida liu husi daum nia kuak lalais liu fali ema riku ida tama iha Maromak nia reinu." ²⁶Sira ne'ebé rona, dehan: "Nune'e karik, se los mak bele hetan maksoin?" ²⁷Jezús hatán: "Buat ne'ebé la bele ba ema, ba Maromak bele de'it." ²⁸Pedro dehan ba Nia: "Ami husik tiha buat hotu hodi tuir Ita." ²⁹Nia hatán ba sira: "Tebes, Ha'u dehan ba imi katak ema ne'ebé husik uma, kaben, inan, aman, maun, alin eh oan sira tanba Maromak nia reinu, ³⁰nia sei simu barak liu fali iha moris ne'e; no aban bainrua, moris rohan laek."

Jezús fo hatene kona ba nia mate

³¹Tuir mai, Jezús halibur sira na'in sanulu resin rua hodi dehan ba sira: "Rona di-diak; ita sa'e ba Jerusalem. Buat hotu ne'ebé profeta sira hakerek kona ba Oan Mane, sei halo tuir duni. ³²Ema sei saran Nia ba gentiu sira ne'ebé sei hamnasa Nia, koalia aat ba Nia, tafui ba Nia; ³³baku tiha Nia, sira sei oho Nia; maibé, liu tiha loron tolu, Nia sei moris hi'as." ³⁴Maibé sira la komprende liafuan ne'e. Liafuan hirak ne'e haksumik hela ba sira. Sira la komprende buat ne'ebé Nia dehan ba sira.

Ema matan delek husi Jeriko

³⁵Wainhira sira hakbesik Jeriko, ema matan delek ida tur husu esmola iha dalan ninin. ³⁶Rona tiha ema sira ne'ebé liu dau-daun, nia husu sa ida mak ne'e. ³⁷Sira dehan ba nia katak Jezús husi Nazare liu dau-daun. ³⁸Nia hakilar: "Jezús, David nia oan, sadia atan ha'u!" ³⁹Sira ne'ebé iha oin haksi'ak nia atu nonok tiha, maibé nia hetok foti lia maka'as liu tan: "David nia oan, sadia atan ha'u!" ⁴⁰Jezús para hodi haruka sira lori nia mai. Wainhira ema matan delek ne'e hakbesik, Jezús husu ba nia: ⁴¹"O hakarak Ha'u halo sa ida ba o?" Nia hatán: "Na'i, halo ha'u haree!" ⁴²Jezús dehan ba nia: "O ba ona, o nia fiar soi tiha o." ⁴³Nia haree kedas no hahu tuir Jezús hodi hawelok Maromak. Haree tiha ne'e, ema hotu hahi Maromak.

19

Zaqueu

¹Tama tiha iha Jeriko, Jezús la'o tesi sidade laran. ²Ema riku ida horik iha ne'ebá. Nia publikanu sira niaulun, naran Zaqueu. ³Nia buka namanas atu haree Jezús, maibé la bele tanba ema barak, basa nia ain badak. ⁴Nia halai hodi sa'e ba ai ida atu haree Jezús, ne'ebé sei liu husi ne'ebá. ⁵To'o tiha fatin ne'ebá, Jezús foti matan hodi dehan: "Zaqueu, tun mai lalais, basa ohin Ha'u sei hela iha o nia uma." ⁶Nia tun kedas hodi simu Jezús ho ksolok boot. ⁷Haree tiha ne'e, sira hotu hamuu, dehan: "Nia tama iha maksalak ida nia uma!" ⁸Maibé Zaqueu hamriik hodi dehan ba Na'i: "Na'i, ha'u sei fahe ha'u nia rikuso balun ba kiak sira; ha'u na'ok tiha karik ema ruma nia sasan, ha'u sei selu fali liu dala haat." ⁹Jezús dehan ba nia: "Ohin maksoin tama iha uma ne'e, tan ema ne'e mos Abraao nia oan; basa Oan Mane mai buka hodi soi sira ne'ebé la'o lakon dalan."

Aiknanoik osan mean nian

¹¹Wainhira sira rona tiha buat hirak ne'e, Jezús haktuir tan aiknanoik ida, tanba Jerusalem besik ona, no mos tanba sira hanoin katak Maromak nia reinu sei mosu lalais. ¹²Nia dehan: "Ema boot ida ba tiha rai dook atu simu reinu, hafoin nia sei fila fali. ¹³Bolu tiha nia atan na'in sanulu, nia fahe ba sira osan mean sanulu, hodi dehan ba sira: 'Fila liman to'o ha'u sei fila fali.' ¹⁴Maibé ema sira iha reinu ne'ebá lakohi nia. Sira haruka manu-ain sira hodi dehan: 'Ami lakohi ema ne'e nu'udar ami nia liurai.' ¹⁵Simu tiha reinu, wainhira nia fila hikas, nia haruka ema bolu atan sira ne'ebé nia fo osan, atu hatene sira manan hira. ¹⁶Ida uluk mai, dehan: 'Na'i, ita nia osan ida manan sanulu tan.' ¹⁷Nia hatán: 'Diak tebes, atan diak, tanba o ema los kona ba sasan uitoan, o sei ukun sidade sanulu.' ¹⁸Atan seluk mai, dehan: 'Ha'u nian manan lima tan.' ¹⁹Nia hatán: 'O mos sei ukun sidade lima.' ²⁰Ida seluk mai, dehan: 'Na'i, ita nia osan mak ne'e. Ha'u rai di-diak iha hena ida, ²¹basa ha'u tauk ita ne'ebé ema si'akten, ne'ebé foti buat ne'ebé la tau no ku'u buat ne'ebé la kuda.' ²²Ba ema ne'e nia simu fali: 'Tanba o nia liafuan rasik, ha'u tesi lia todan hasoru o, atan aat. O hatene katak ha'u ema laran tos, ne'ebé foti buat ne'ebé la tau, ku'u buat ne'ebé la kuda. ²³Ne'e duni, tansa o la hatama ha'u nia osan iha banku atu, fila tiha, ha'u bele manan nia osan funan?' ²⁴Hafoin Nia dehan ba sira ne'ebé hamriik iha ne'ebá: 'Hasai tiha nia osan, hodi fo fali ba ida ne'ebé iha sanulu.' ²⁵Sira dehan: 'Na'i, nia iha ona osan sanulu.' ²⁶Maibé nia simu: 'Ha'u dehan ba imi katak ba ida ne'ebé iha ona, sei fo tan; maibé husi ida ne'ebé la iha, sei hasai tan buat ne'ebé nia iha. ²⁷Kona ba ha'u nia funubalun sira ne'ebé lakohi ha'u atu ukun sira, lori sira mai iha ne'e, oho tiha sira iha ha'u nia oin!'" ²⁸Dehan tiha ne'e, Jezús la'o hodi sa'e ba Jerusalem.

Jezús tama iha Jerusalem

Wainhira Nia to'o Betfage no Betania, besik foho ida naran Oliveira, Jezús haruka eskolante na'in rua, dehan: ³⁰"Imi ba iha knua iha oin. To'o tiha ne'ebá, imi sei hetan kuda oan ida, ne'ebé ema la dauk sa'e, kesi hela. Imi kore tiha nia, hodi lori mai. ³¹Ema ruma husu karik tansa imi kore nia, imi sei hateten nune'e: 'Na'i presisa nia.' ³²Sira na'in rua ba, hodi hetan buat hotu nu'udar Jezús dehan. ³³Wainhira sira kore dau-daun, kuda na'in dehan ba sira: "Tansa imi kore kuda oan?" ³⁴Sira hatán: "Na'i presisa nia." ³⁵Sira lori nia ba Jezús. Hafoin, tau tiha sira nia hatais iha kuda leten, sira tulun Jezús atu sa'e. ³⁶Wainhira Nia liu dau-daun, sira nahe sira nia hatais iha dalan. ³⁷Besik ona atu to'o foho Oliveira, ema lubun boot ne'ebé tuir Jezús hahu hawelok Maromak ho ksolok no lia maka'as tan buat diak ne'ebé sira haree, dehan: ³⁸"Rahun diak ba ida ne'ebé mai nu'udar liurai hodi Na'i nia naran! Dame iha lalehan, gloria iha leten aas ba!" ³⁹Husi ema lubun boot sira leet, fariseu balun dehan ba Jezús: "Mestre, haksi'ak o nia eskolante sira!" ⁴⁰Maibé Jezús hatán: "Ha'u dehan ba imi katak, sira ne'e nonok karik, fatuk sira mak sei hakilar!"

Jezús tanis tanba Jerusalem

⁴¹Hakbesik tiha hodi haree sidade, Jezús tanis tanba nia, dehan: ⁴¹"O hatene karik ohin loron ne'e Ida ne'ebé lori dame ba o! Maibé buat ne'e subar hela ba o nia matan. ⁴³Loron sei mai wainhira o nia funubalun sira sei hada rai hodi hale'u o husi fatin hotu; ⁴⁴sira sei hanehan o ba rai, no mos o nia oan sira iha o nia laran; sira sei la husik fatuk ida hamriik iha fatuk seluk nia leten, basa o la hatene nanis loron ne'ebé o simu Na'i nia visita ne'e."

Jezús duni sai kontratu na'in sira husi templu

⁴⁵Tuir mai, tama tiha iha templu, sira hahu duni sai sira ne'ebé halo kontratu, hodi dehan ba sira: ⁴⁶"Hakerek tiha ona: 'Ha'u nia uma uma orasaun nian; maibé imi halo tiha nia na'okten sira nia luhlan nian!'"

⁴⁷Loron loron Nia hanorin iha templu. Am'lulik sira niaulun sira, eskriba sira no mos na'iulun sira povu nian buka atu halakon Nia. ⁴⁸Maibé sira la hatene atu halo oin sa, basa povu tomak hakarak teb-tebes rona Nia.

20

Jezús nia kbiit

¹Loron ida, wainhira Nia hanorin povu iha templu hodi haklaken evangeliu, am'lulik niaulun sira, eskriba sira no katuas sira hakbesik hodi hateten ba Nia: ²"Dehan to'ok mai ami ho kbiit ida ne'ebé mak o halo buat hirak ne'e, ka se mak fo kbiit ne'e ba o." ³Jezús hatán ba sira: "Ha'u mos sei husu buat ida ba imi. Dehan to'ok mai Ha'u: ⁴João nia baptismu mai husi lalehan ka husi ema sira?" ⁵Sira hanoin hodi dehan ba malu: "Ita hatán karik 'Husi lalehan', Nia sei husu: 'Tansa imi la fiar nia?' ⁶Ita hatán karik 'Husi ema sira', povu tomak sei tuda ita ho fatuk, basa sira haree João nu'udar profeta." ⁷Tan ne'e, sira hatán katak sira la hatene husi ne'ebé. ⁸Jezús dehan ba sira: "Ha'u mos sei la dehan ba imi ho kbiit ida ne'ebé mak Ha'u halo buat hirak ne'e."

Aiknanoik kona ba serbisu na'in sira iha to'os uvas nian

⁹Tuir mai, Nia hahu haktuir ba povu aiknanoik ida ne'e: "Ema ida kuda uvas iha to'os ida, ne'ebé nia aluga ba serbisu na'in sira. Hafoin nia ba dook hodi hela kleur. ¹⁰Wainhira tempu to'o ona, nia haruka atan ida ba serbisu na'in sira atu sira ne'e fo ba nia husi to'os nia fuan. Maibé sira baku nia, hodi duni sai nia ho liman mamuk. ¹¹Liu tiha ne'e, nia haruka atan ida seluk, maibé ida ne'e mos sira baku, hanehan no duni sai ho liman mamuk. ¹²Ba dala tolu nia haruka ida tan, ne'ebé sira hakanek hodi soe ba liur. ¹³Ikus mai, to'os na'in dehan: 'Ha'u sei halo sa los? Ha'u sei haruka ha'u nia oan doben. Haree tiha nia, sira sei respeita nia karik.' ¹⁴Maibé, haree tiha nia, serbisu na'in sira dehan ba malu: 'Ida ne'e mak liman rohan na'in. Ita ba oho nia, atu liman rohan monu ba ita nia liman.' ¹⁵Nune'e, soe tiha nia ba to'os liur, sira oho nia. To'os na'in sei halo sa los ba sira? ¹⁶Nia sei mai, hodi oho serbisu na'in sira ne'e, hafoin sei saran to'os ne'e ba ema seluk." Rona tiha ne'e, sira simu dehan: "Ne'e la bele!" ¹⁷Maibé, hateke dau-daun ba sira, Jezús dehan ba sira: "Lia ne'ebé hakerek ne'e dehan katak sa: 'Fatuk ne'ebé badaen sira hewai, sai fali fatuk inan?' ¹⁸Sira hotu ne'ebé monu iha fatuk ne'e nia leten sei mohu hela; fatuk ne'e monu karik iha ema ruma nia leten, sei hanehan nia." ¹⁹Eskriba sira no na'iulun am'lulik sira nian haka'as an atu kaer Nia, basa sira hatene katak aiknanoik ida ne'e kona ba sira, maibé sira tauk povu.

Impostu ba Cesar

²⁰Sira hafu Nia sub-subar, hodi haruka emar sira ne'ebé hakfudik nu'udar ema diak, atu kaer Nia iha liafuan ruma, atu nune'e sira bele saran Nia ba gubernador nia liman no kbiit. ²¹Sira husu ba Nia: "Mestre, ami hatene katak ita koalio no hanorin ho lialos, la fihir ema, maibé hatudu Maromak nia dalan tuir lialos. ²²Ami bele selu impostu ba Cesar ka lae?" ²³Hatene tiha sira nia laran makerek, Nia hatán ba sira: ²⁴"Hatudu lai mai Ha'u osan denariu ida. Ilas ho hakerek ne'e, se nian?" Sira hatán: "Cesar nian." ²⁵Nia dehan fali: "Ne'e duni, fo ba Cesar buat ne'ebé Cesar nian, no ba Maromak buat ne'ebé Maromak nian." ²⁶Sira la biban atu kaer Nia iha lia sala ida iha povu nia oin; hakfodak tiha ho nia liafuan, sira nonok tiha.

Kona ba matebian sira nia moris hi'as

²⁷Ema saduseu balun, ne'ebé la fiar moris hi'as, hakbesik hodi husu ba Nia: ²⁸"Mestre, Moises hakerek katak mane ida mate karik hodi husik nia feen maibé oan la iha, nia alin mane sei hola feto faluk ne'e atu fo oan sira ba nia maun. ²⁹Iha kedas maun alin na'in hitu. Ida uluk hola feto, hodi mate oan la iha. ³⁰Alin ne'ebé tuir nia kaben fali ho feto faluk ne'e; tuir mai ida seluk, nune'e mos sira na'in hitu mate hotu la husik oan ida. ³²Ikus liu, feto faluk mos mate. ³³Ne'e duni, iha loron moris hi'as nian, feto ne'e se nia feen los? Basa sira na'in hitu hola tiha nia" ³⁴Jezús dehan ba sira: "Mundu ne'e nia oan sira hola malu

nu'udar laen feen,³⁵ maibé sira ne'ebé soi ba mundu seluk no ba moris hi'as husi mate sira leet, sira ne'e la kaben,³⁶ tan sira la bele mate tan, basa sira hanesan anju sira. Nu'udar moris hi'as nia oan sira, sira Maromak nia oan.³⁷ Kona ba moris hi'as ema mate sira nian, Moises rasik mak hatudu hodi hakerek kona ba aitarak ne'ebé lakan maibé ahi la han, wainhira nia bolu Na'i 'Abraao nia Maromak, Isaac nia Maromak, no Jacob nia Maromak.'³⁸ Nia la'os ema mate sira nia Maromak, maibé ema moris sira nian; basa ba Na'i, ema hotu moris hela."³⁹ Tuir mai, eskriba balun simu hodi dehan: "Mestre, Ita koalía los."⁴⁰ No sira la berani atu husu tan buiat ida.

Jezús ho David

⁴¹Nia dehan ba sira: "Oin sa ema dehan katak Messias mak David nia oan?"⁴² Basa David rasik mak dehan iha livru salmu sira nian: 'Na'i dehan ba ha'u nia Na'i: Tur iha Ha'u nia sorin kuana,⁴³ to'o Ha'u tau O nia funubalun sira iha O nia ain sira okos.'⁴⁴ David bolu Nia karik 'Na'i,' nusa mak nia bele sai nia oan fali?"⁴⁵ Wainhira povu tomak rona Nia, Jezús dehan ba nia eskolante sira: ⁴⁶"Imi matan moris kona ba eskriba sira ne'ebé gosta la'o ho hatais naruk atu ema kumprimenta sira iha luron, hodi buka fatin uluk iha sinagoga no iha festa sira; ⁴⁷ne'ebé han feto faluk sira nia sasan sira hodi hakfudik hamulak barak: sira ne'e sei hetan kastigu aat liu."

21

Feto faluk nia esmola

¹Foti tiha matan, Nia haree ema riku sira tau esmola iha osan fatin templu nian. ²Nia haree mos feto faluk kiak ida ne'ebé tau nia esmola kiik. ³Nia dehan: "Tebes, Ha'u dehan ba imi katak feto faluk kiak ne'e tau osan folin liu sira seluk hotu, ⁴basa husi buat ne'ebé resin, sira fo buat karan ba Maromak, maibé ema kiak ne'e saran buat hotu ne'ebé nia iha atu moris."

Jezús si'ik kona ba templu

⁵Tan ema balun koalía kona ba templu hodi hateten katak ema hafutar nia ho fatuk mesa furak no buat karan sira, Jezús dehan: ⁶"Loron sei to'o wainhira buat ne'ebé imi haree dau-daun ne'e sei sobu hotu; fatuk ida sei la hela iha fatuk seluk nia leten."⁷ Sira husu ba Nia: "Mestre, wainhira mak buat hirak ne'e mosu? Sira sei hahu ho sinal ida ne'ebé?"⁸ Nia hatán: "Haree ba, atu ema keta lohi imi; basa ema barak sei mosu mai hodi ha'u nia naran, dehan 'Mak ha'u!' eh 'Loron besik ona!' Imi keta tuir sira."⁹ Wainhira imi rona koalía kona ba funu no revolusaun sira, keta tauk, basa buat hirak ne'e hotu sei mosu uluk, maibé ne'e la'os katak rohan to'o ona mai."¹⁰ Hain Nia dehan ba sira: "Povu ida sei hamriik halo funu hasoru povu seluk, reinu ida hasoru reinu seluk."¹¹ Rai sei nakdoko maka'as; iha fatin oi-oin ema sei hamlaha, moras peste sei mosu; buat ne'ebé halo ema tauk sei mosu mai, ho sinal bo-boot sira iha lalehan.¹² Maibé uluk liu buat ne'e hotu, ema sei kaer imi, sei duni imi, sei lori imi ba sinagoga no hatama imi iha dadur laran. Ema sei saran imi ba liurai no emboot sira hodi Ha'u nia naran;¹³ maibé imi sei biban atu fo sasin.¹⁴ Ne'e duni, keta haluha, imi lalika hanoin resin atu hatán oin sa;¹⁵ basa Ha'u sei fo ba imi lia matenek, ne'ebé imi nia funubalun sira hotu sei la bele tahan eh koalía hasoru.¹⁶ Imi nia aman inan, maun alin, parenti no belun sira mak sei saran imi. Ema sei oho imi balun.¹⁷ Ema hotu sei hakribi imi tan Ha'u nia naran.¹⁸ Maibé imi nia fuuk lahan ida mos sei la monu lakon.¹⁹ Imi fiar metin nafatin karik, imi sei soi imi nia kllamar."

²⁰"Wainhira imi haree soldadu sira hale'u Jerusalem, imi sei hatene los katak nia besik ona atu mohu."²¹ Iha loron ne'e sira ne'ebé iha Judeia, halai ba foho sira; sira ne'ebé iha sidade laran, sai tiha; sira ne'ebé iha to'os, keta tama fali iha sidade.²² Basa ne'e mak loron kastigu nian, iha ne'ebé sei sai tuir los buat ne'ebé hakerek ona.²³ Rahun aat ba feto sira ne'ebé ko'us eh hasusu iha loron ne'e, basa sei iha tauk boot no hirus hasoru povu ne'e.²⁴ Sira sei monu iha surik kroat nia okos, ema sei lori sira hanesan ema dadur ba rai hotu, no gentiu sira sei sobu rahun Jerusalem to'o sira nia otas sei hotu ona."

Sinal sira loron ikus nian

²⁵"Sinal sira sei mosu iha loron, iha fulan no fitun sira. Iha raiklaran, nasaun sira sei susar no tauk teb-tebes tanba tarutu husi laloran no tasi nian.²⁶ Ema sira sei mate de'it tanba tauk, hodi hanoin sa ida mak sei mosu iha raiklaran, basa lalehan nia kbiit sei nakdoko."²⁷ Iha oras ne'e, sira sei haree Oan Mane tun mai iha kalohan ida ho kbiit no gloria wa'in tebes.²⁸ Wainhira buat hirak ne'e sei mosu, imi aten berani, hodi foti matan ba leten, basa imi nia Maksuin besik ona."

Aiknanoi ai figueira nian

²⁹Nia haktuir tan ba sira aiknanoi ida ne'e: "Imi haree di-diak ai figueira no ai sira seluk."³⁰ Wainhira sira hahu hatubun tahan nurak, imi hatene katak bainloron besik ona.³¹ Nune'e mos, wainhira imi haree buat hirak ne'e mosu, imi sei hatene katak Maromak nia reinu besik ona.³² Tebes Ha'u dehan ba imi: otas ne'e sei la liu, to'o buat ne'e mosu."³³ Lalehan no rai sei liu, maibé Ha'u nia liafuan sira sei la liu."

³⁴"Imi matan moris neon na'in ba; imi laran keta todan tan hahalok aat sira, tan lanu, tan fo neon resin ba moris ne'e, atu loron ne'e keta to'o teki-teki de'it;³⁵ basa nia sei monu hanesan hani ida ba ema hotu iha raiklaran tomak."³⁶ Ne'e duni, imi matan moris hodi hamulak nafatin, atu imi bele hetan kbiit hodi hadook an husi buat hotu ne'ebé sei mosu no bele hamriik metin iha Oan Mane nia oin."

³⁷Iha loron, Jezús hanorin iha templu, maibé iha kalan Nia hela iha foho ida naran Oliveira.³⁸ Iha dadersan povu tomak ba iha templu atu rona Nia.

22

Judas saran Jezús

¹Loron festa Paun fermentu laek nian, naran Paskua, besik dau-daun ona.² Am'lulik nia ulun sira no eskriba sira buka dau-daun oin sa atu halakon Nia, maibé sira tauk povu.³ Satanas tama tiha iha Judas, naran Iscariotes, husi sira na'in sanulu resin rua ne'e ida, nia laran.⁴ Nia ba koalía ho am'lulik no na'i ulun sira kona ba atu saran Jezús ba sira.⁵ Sira haksolok no sira hakotu lia atu fo osan ba nia.⁶ Judas simu hodi buka loron atu saran Jezús wainhira ema sira la hatene.

Hadia Paskua

⁷To'o tiha loron Paun fermentu laek nian, wainhira sira oho bibi oan Paskua nian.⁸ Jezús haruka Pedro ho João, dehan: "Imi ba hadia Paskua ba ita atu han."⁹ Sira husu ba Nia: "Ita hakarak ami hadia iha ne'ebé?"¹⁰ Nia hatán: "Tama tiha iha sidade, ema ida ne'ebé lori kusi be nian sei mai hasoru imi. Imi tuir nia to'o uma ne'ebé nia tama,¹¹ hodi dehan ba uma na'in: 'Mestre husu, fatin ne'ebé Nia sei han Paskua ho nia eskolante sira mak iha ne'ebé?'¹² Nia sei hatudu ba imi han fatin boot iha andar leten. Imi sei hadia iha ne'ebá."¹³ Sira ba, hodi hetan buat hotu nu'udar Nia dehan ba sira; hain sira hadia Paskua.

Jezús nia han-hemu dala ikus

¹⁴Wainhira oras to'o ona, Nia tur atu han hamutuk ho apostolu na'in sanulu resin rua.¹⁵ Nia dehan ba sira: "Hodi kbiit, Ha'u hakarak teb-tebes han Paskua ne'e ho imi molok Ha'u terus."¹⁶ Basa Ha'u dehan ba imi katak Ha'u sei la han tan nia to'o nia sei sai los iha Maromak nia reinu."¹⁷ Kaer tiha kalis, Jezús fo agradese, dehan: "Imi simu ba, hodi fahe ba malu;¹⁸ basa Ha'u sei la hemu tan tua uvas fuan nian to'o Maromak nia reinu to'o mai."

¹⁹Hain, hola tiha paun hodi fo obrigadu, Nia silu hodi fahe, dehan: "Ne'e Ha'u nia isin, ne'ebé sei saran tanba imi; halo ida ne'e hodi hanoin Ha'u."²⁰ Han hotu tiha, Nia halo nune'e mos ho kalis, dehan: "Ne'e kalis moruk foun nian iha Ha'u nia ran, ne'ebé sei nakfakar tanba imi."²¹ Maibé ema ne'ebé atu saran Ha'u ba mate, nia liman besik Ha'u nian iha meja.²² Basa Oan Mane atu ba ona duni, tuir buat ne'ebé hakotu tiha ona; maibé susar ba ema ne'ebé saran Nia!"²³ No sira hahu husu ba malu sira ida ne'ebé mak sei halo buat ne'e.

Se mak boot liu

²⁴Tuir mai, sira hahu hakesesuk malu kona ba sira ida ne'ebé mak boot liu hotu. ²⁵Jezús dehan ba sira: “Liurai nasaun sira nian ukun ho kroat, no ema hanaran sira ne'ebé ukun sira ‘tulun na'in.’” ²⁶Imi fali keta halo nune'e; maibé ida ne'ebé boot liu iha imi leet, nia sei halo an nu'udar kiik liu; ida ne'ebé ukun sei halo an nu'udar atan. ²⁷Basa, ida ne'ebé mak boot liu: ida ne'ebé tur han iha meja, ka ida ne'ebé serbi? La'os ida ne'ebé tur han? Ha'u iha imi leet nu'udar ida ne'ebé serbi. ²⁸Imi hela tiha hamutuk ho Ha'u iha Ha'u nia susar oi-oin, ²⁹no Ha'u saran ba imi reinu ne'ebé Ha'u Aman saran mai Ha'u, ³⁰atu imi bele han hemu hamutuk ho Ha'u iha Ha'u nia reinu, hodi tur iha kadunan sira atu tesi lia ba Israel nia uma-kain sanulu resin rua.”

Pedro sei heli lia kona ba Jezús

³¹“Simão, Simão, haree ba, Satanás husu ona kbiit atu doko imi hodi tais hanesan trigu. ³²Maibé Ha'u harohan ona ba o, atu o nia fiar keta monu; hafoin wainhira o fila fali ba diak, o sei fo aten berani ba o nia maun alin sira.” ³³Nia hatán: “Na'i, ha'u sei ba hamutuk ho Ita to'o dadur no mos to'o mate!”

³⁴Jezús dehan ba nia: “Ha'u dehan ba o, Pedro: ohin, molok manu kokorek, o sei heli lia dala tolu katak o la hatene Ha'u.”

³⁵Nia dehan tan: “Wainhira Ha'u haruka imi atu ba, hodi la bele lori kohe, osan no sandalias, imi kuran buat ruma?” ³⁶Sira hatán: “Lae.” Nia dehan ba sira: “Maibé, oras ne'e ema ne'ebé la iha kohe, hola ida ba, nune'e mos nia karon; no ida ne'ebé la iha surik, faan tiha nia unuk, hodi sosa netik surik ida. ³⁷Basa Ha'u dehan ba imi katak sei sai tuir lo-los iha Ha'u buat ne'ebé hakerek nanis ona: ‘Sira tau Ha'u iha ema aat sira leet.’ Tebes, buat ne'ebé kona Ha'u besik ona nia rohan.” ³⁸Sira dehan ba Nia: “Na'i, iha ne'e iha surik rua.” Maibé Nia hatán ba sira: “To'o ona.”

Hanorin iha foho Oliveira

³⁹Sai tiha husi uma, Jezús, hanesan bai-bain, la'o ba foho Oliveira; nia eskolante sira mos tuir Nia. ⁴⁰To'o tiha ne'ebá, Nia dehan ba sira: “Imi harohan ba, atu imi keta monu ba babeur.” ⁴¹Hafoin Nia hadook an husi sira, dook hanesan wainhira ema tuda fatuk. Nia hakneak hodi hahu hamulak nune'e: ⁴²“Aman, Ita hakarak karik hadook tiha kalis ne'e husi Ha'u; maibé halo tuir Ita nia hakarak ba, la'os Ha'u nian.” ⁴³Iha oras ne'e, anju ida mosu husi lalehan hodi haksolok netik Nia. ⁴⁴Ho laran susar teb-tebes, Nia hamulak ho neon ho laran liu tan. Nia kosarben sai hanesan ran ne'ebé suli ba rai.

⁴⁵Harohan hotu tiha, Nia hamriik hodi ba buka nia eskolante sira; ho neon sala, Nia hetan sira toba hela. ⁴⁶Nia dehan ba sira: “Tansa imi toba? Hamriik ba hodi harohan, atu imi keta monu ba babeur.”

Sira kaer Jezús

⁴⁷Nia sei koalia hela, ema lubun boot ida mosu mai. Ida ne'ebé naran Judas, sira na'in sanulu resin rua ne'e ida, mai iha oin. Nia hakbesik hodi rei Jezús. ⁴⁸Jezús dehan ba Nia: “Judas, hodi rei Ha'u mak o saran Oan Mane ba mate?” ⁴⁹Haree tiha buat ne'ebé atu mosu dau-daun, sira ne'ebé hale'u Jezús husu ba Nia: “Na'i, ami bele hakanek ho surik, ka lae?” ⁵⁰Sira ida hakanek tiha am'lulik boot nia atan ida, ho tesi nia tilun kuana. ⁵¹Maibé Jezús dehan: “To'o ona!” Hafoin, kona tiha atan ne'e nia tilun, Jezús halo nia kanek sai diak fali. ⁵²Tuir mai, Nia dehan ba sira ne'ebé mai hasoru Nia, ba am'lulik sira nia na'i ulun sira, na'i ulun sira templu nian no katuas sira: “Imi mai ho surik no ai-tonka sira hanesan hasoru na'okten ida?” ⁵³Loron loron Ha'u hela ho imi iha templu, imi la halo buat ida mai Ha'u; maibé ne'e imi nia loron, ne'e nakukun nia ukun.”

Pedro heli lia kona ba Jezús

⁵⁴Kaer tiha Jezús, sira lori Nia ba am'lulik boot nia uma. Pedro la'o tuir husi dook. ⁵⁵Sira sunu ahi ida iha uma oin, hodi tur hadulas; Pedro mos iha sira leet. ⁵⁶Haree tiha nia haneruk ahi, atan fetu ida fihir nia, hodi dehan: “Ema ne'e mos hela ho Jezús.” ⁵⁷Maibé Pedro heli lia, dehan: “Fetu, ha'u la hatene Nia!” ⁵⁸La kleur ida seluk, haree tiha nia, dehan: “O mos Nia maluk ida!” Maibé Pedro hatán: “Ha'u lae!” ⁵⁹Liu tiha besik oras ida, ida seluk litik: “Tebes, ida ne'e mos hela ho Nia, tan nia mos ema Galileu.” ⁶⁰Pedro simu dehan: “Ha'u la hatene buat ne'ebé o dehan!” Iha oras ne'e kedas, wainhira nia sei koalia hela, manu kokorek. ⁶¹Fila tiha oin, Na'i hateke ba Pedro. Pedro hanoin fali Na'i nia liafuan uluk, ne'ebé dehan: “Molok manu kokorek, o sei heli lia dala tolu kona ba Ha'u.” ⁶²Sai tiha ba liur, Pedro tanis ho neon sala teb-tebes.

Judeu sira tesi lia

⁶³Ema sira ne'ebé kaer Jezús hahu hamoe no haterus Nia. ⁶⁴Sira taka Nia futar oin, hodi husu ba Nia: “O si'ik to'ok: se mak baku o?” ⁶⁵Sira foti lia aat barak hasoru Nia.

⁶⁶Molok rai-hun mutin, katuas sira povu nian, am'lulik no eskriba sira nia ulun sira halibur an hamutuk. Sira lori Jezús atu tesi lia hasoru Nia. ⁶⁷Sira dehan: “O Messias karik, hateten mai ami ba.” Nia dehan ba sira: “Ha'u hateten karik, imi sei la fiar Ha'u; ⁶⁸Ha'u husu imi karik, imi sei la hatán. ⁶⁹Maibé houri ohin ba oin Oan Mane sei tur iha Maromak nia futar sorin.” ⁷⁰Sira hotu dehan: “Ne'e duni, O Maromak Oan, ka?” Nia hatán: “Imi dehan los, Ha'u duni.” ⁷¹Sira dehan: “Ita hakarak sasin sa ida tan? Ita nia tilun rasik mak rona husi nia ibuni!”

Jezús iha Pilatos nia oin

¹Sira hotu hamriik, hodi lori Nia ba Pilatos. ²Sira hahu duu Nia, dehan: “Ami hetan ema ne'e soran ami nia povu, bandu ema atu selu impostu ba Cesar, hodi dehan katak nia mak Messias liurai.” ³Pilatos husu, “O Judeu sira nia liurai?” Nia hatán, “O dehan los.” ⁴Pilatos dehan fali ba am'lulik sira nia ulun sira no ba ema lubun boot: “Ha'u la hetan sala ida iha ema ne'e.” ⁵Maibé sira litik, dehan: “Nia soran povu hodi hanorin iha rai Judeia tomak, hahu husi Galileia to'o iha ne'e.”

⁶Rona tiha ne'e, Pilatos husu Nia husi Galileia, ka lae. ⁷No hatene tiha katak Nia Herodes nia emar, Pilatos haruka Nia ba Herodes, ne'ebé mai mos iha Jerusalem iha loron hirak ne'ebá.

Jezús iha Herodes nia oin

⁸Wainhira Herodes haree Jezús, nia haksolok teb-tebes; kleur ona mak nia hakarak haree Jezús, tan buat barak ne'ebé nia rona, hodi hein Jezús sei halo milagre ruma iha nia oin. ⁹Nia husu buat oi-oin ba Jezús, maibé Jezús la hatán buat ida. ¹⁰Am'lulik sira nia ulun sira no mos eskriba sira iha ne'ebá litik hodi foti lia hasoru Jezús. ¹¹Herodes ho nia soldadu sira hasara Nia, fo hatais unuk mean ida ba Nia hodi hamnasa, hafoin haruka Nia fila fali ba Pilatos. ¹²Iha loron ne'ebá Herodes ho Pilatos badame fali malu, tan uluk sira haree malu la diak.

Jezús fila fali ba Pilatos

¹³Pilatos halibur am'lulik sira nia ulun sira, na'i ulun sira ho tan povu, hodi dehan ba sira: ¹⁴“Imi lori ema ne'e mai ha'u tan Nia soran povu. Ha'u husu Nia iha imi nia oin, maibé iha Nia ha'u la hetan sala ida husi buat hirak ne'ebé imi duu Nia. ¹⁵Herodes mos la hetan buat ida; tan ne'e, nia haruka fali mai ha'u. Ema ne'e la halo buat ida atu ita saran nia ba mate. ¹⁶Ne'e duni, ha'u sei kastigu Nia hodi husik Nia ba.”

¹⁷Nia ten ke husik ema ida ba sira iha loron festa. ¹⁸Maibé sira hotu hakilar, dehan: “Oho tiha nia! Hasai mak Barrabas!” ¹⁹Barrabas ne'e ema iha dadur laran tan halo funu hasoru estadu iha sidade no oho ema. ²⁰Dala ida tan Pilatos koalia ba sira, hodi buka soi Jezús. ²¹Maibé sira hakilar nafatin: “Hedi Nia ba krus! Hedi Nia ba krus!” ²²Ba dala tolu nia dehan ba sira: “Nia halo aat sa? Ha'u la hetan sala ida atu oho Nia. Ne'e duni, ha'u sei kastigu Nia, hafoin husik Nia ba.” ²³Maibé sira litik, hodi husu ho lia maka'as atu hedi Nia ba krus. Sira nia lia maka'as liu tan ba dau-daun. ²⁴Ne'e duni, Pilatos haraik buat ne'ebé sira husu; ²⁵nia hasai ema ne'ebé dadur tan soran povu no oho ema, no saran Jezús ba sira tuir sira nia hakarak.

Dalan ba foho Kalvariu

²⁶Wainhira sira lori Nia, sira kaer ema ida husi Sirene naran Simão, ne'ebé fila dau-daun husi to'os, hodi tau krus iha nia kbaas atu lori tuir Jezús. ²⁷Ema lubun boot tuir Nia, no mos feto sira ne'ebé tanis hodi hanoin tebes Nia. ²⁸Maibé Jezús fila oin ba sira, dehan: "Jerusalem nia oan feto sira, imi keta tanis tanba Ha'u; diak liu tanis tan imi an rasik no tan imi nia oan sira. ²⁹Basa loron sei to'o mai wainhira ema sei dehan: 'Rahun diak ba feto sira ne'ebé oan la iha, knotak sira ne'ebé la ko'us, hirus matan sira ne'ebé la fo susuben.' ³⁰Iha loron ne'ebá sira sei dehan ba foho aas sira: 'Imi monu mai ami leten!' no ba foho kiik sira: 'Imi taka tiha ami!' ³¹Basa sira halo ona nune'e karik ba ai-hun matak, ba ai-hun maran sira sei halo sa ida?"

Ema hedi Jezús ba krus

³²Sira lori mos ema aat na'in rua atu oho hamutuk ho Nia. ³³Wainhira sira to'o fatin naran Kalvariu, sira hedi Nia ba krus ho ema aat sira ne'e, ida iha sorin kuana, ida seluk iha sorin karuk. ³⁴Jezús dehan: "Aman, perdua sira, basa sira la hatene buat ne'ebé sira halo." Tuir mai sira dada sorte atu fahe ba malu Jezús nia unuk sira. ³⁵Ema sira hamriik hodi hateke hela. Na'i ulun sira hamoe Nia, dehan: "Nia ne'ebé soi ema seluk, soi to'ok nia an; ema ne'e Maromak nia Messias karik." ³⁶Soldadu sira mos hamoe Nia, hodi hakbesik atu fo ba Nia tua sin, ³⁷dehan: "O Judeu sira nia liurai karik, soi o nia an ba!" ³⁸Iha nia ulun leten ema hakerek ho lia gregu, latin no ebreu: "Ne'e mak Judeu sira nia liurai." ³⁹Ema aat sira ida, ne'ebé tara hela, koalia aat Nia, dehan: "O mak Messias karik, soi o an rasik, no mos ami!" ⁴⁰Maibé ida seluk haks'i'ak nia, dehan: "O mos hetan terus ne'e, o la tauk Maromak?" ⁴¹Tuir duni justisa mak ita hetan kastigu, tan ita nia hahalok aat; maibé ema ne'e la halo aat ida." ⁴²Hafoin nia dehan ba Jezús: "Na'i, hanoin ha'u wainhira Ita to'o Ita nia reinu." ⁴³Jezús hatán ba nia: "Tebes, Ha'u dehan ba o: ohin kedas o sei hamutuk ho Ha'u iha lalahan."

Jezús nia mate

⁴⁴Besik ona loron fahe rua, nakukun taka rai tomak to'o tuku tolu loraik, tan loro matan lakon tiha. ⁴⁵Hena templu nian nakles fahe rua iha klanan, ⁴⁶no Jezús hakilar ho lia maka'as: "Aman, iha Ita liman Ha'u saran Ha'u nia klamar!" Dehan tiha ne'e, Nia iis kotu.

⁴⁷Haree tiha buat ne'ebé mosu, senturiaun hahi Maromak, dehan: "Tebes, ema ne'e, ema diak duni!"

⁴⁸Ema lubun boot ne'ebé mai haree buat ne'e, haree hotu tiha, sira fila fali hodi tuku hirus matan. ⁴⁹Jezús nia belun sira, no mos feto sira ne'ebé tuir Nia husi Galileia, hamriik hodi haree husi dook.

Ema hakoi Jezús

⁵⁰Iha na'i ulun ida, naran Jose, ema laran diak ida husi rai Arimateia, sidade ida iha Judeia. ⁵¹Nia membru ida konseliu nian, nia la tuir nia maluk sira nia hakarak no hahalok sira, maibé hein dau-daun Maromak nia reinu. ⁵²Nia ba koalia ho Pilatos, hodi husu Jezús nia isin mate. ⁵³Hatun tiha husi krus, nia falun tiha Nia ho hena mutin, hodi tau Nia iha rate foun ida, iha ne'ebé seidauk hakoi ema ida. ⁵⁴Ne'e loron atu hadia sasan, no loron Sabadu atu hahu ona. ⁵⁵Feto sira ne'ebé tuir Nia husi Galileia ba hamutuk ho Jose. ⁵⁶Wainhira sira fila fali ona, sira hadia mina morin. Iha Sabadu sira la kaer serbisu tuir lisan.

24

Jezús moris hi'as

¹Iha loron uluk semana nian, iha rai hun mutin, sira ba to'o rate, hodi lori mina morin ne'ebé sira hadia. ²Sira hetan fatuk duir tiha ona. ³Tama tiha iha laran, sira la hetan Na'i Jezús nia isin. ⁴Sira sei hanoin hela, wainhira ema na'in rua ho unuk nabilan mosu iha sira leet. ⁵Tan feto sira tauk, hodi hakru'uk ba rai, ema sira ne'e dehan ba sira: "Tansa imi buka ema moris iha mate sira leet?" ⁶Nia la iha ne'e; Nia moris hi'as ona! Imi hanoin fali oin sa Nia koalia ba imi, wainhira Nia sei iha Galileia, dehan: ⁷Ema sei saran Oan Mane ba maksalak sira liman, ne'ebé sei hedi Nia ba krus; liu loron tolu, Nia sei moris hi'as." ⁸No sira hanoin fali Jezús nia liafuan sira.

⁹Fila tiha husi rate, sira ba haktuir buat hirak ne'e hotu ba sira na'in sanulu resin ida no ba sira seluk hotu. ¹⁰Feto sira ne'ebé haktuir ba apostolu sira buat hirak ne'e mak Maria Madalena, Joana ho Maria, Tiago nia inan, no mos sira seluk ne'ebé la'o hamutuk ho sira. ¹¹Maibé sira rona lia hirak ne'e nu'udar lia bulak, tan ne'e sira la fiar. ¹²Maibé Pedro hamriik hodi ba lalais rate. Hakru'uk tiha, nia haree de'it hena sira. Nia fila fali ba uma, hodi hakfodak ho buat ne'ebé mosu tiha.

Dalan Emaus nian

¹³Iha loron ne'ebá eskolante na'in rua la'o ba knua ida naran Emaus, besik kilometru ualu husi Jerusalem. ¹⁴Sira koalia ba malu kona ba buat ne'ebé mosu ona. ¹⁵Sira sei koalia hodi haksasuk malu dau-daun, Jezús rasik hakbesik hodi la'o hamutuk ho sira. ¹⁶Maibé sira nia matan la dauk nakloke atu hatene Nia. ¹⁷Nia dehan ba sira: "Imi koalia ba malu kona ba sa ida tuir dalan?" Sira para tiha ho oin kraik. ¹⁸Sira ida naran Cleofas simu, hodi dehan: "Ita mesak ema husi rai seluk iha Jerusalem mak la hatene buat ne'ebé mosu iha ne'ebá iha loron hirak ne'e?" ¹⁹Nia husu ba sira: "Sa ida?" Sira hatán: "Kona ba Jezús Nazare, profeta ida heran boot iha lia no hahalok, iha Maromak no povu tomak nia oin: ²⁰oin sa ita nia am'lulik no na'i ulun sira saran Nia ba mate hodi hedi Nia ba krus. ²¹Ami hanoin katak Nia mak atu soi Israel, maibé liu ona loron tolu mak buat hirak ne'e mosu. ²²Los duni, ami nia feto balun halo ami hakfodak, basa dadersan hela, sira ba rate; ²³hafoin, la hetan Nia isin, sira mai haktuir katak sira haree anju sira ne'ebé dehan katak Nia moris hi'as ona. ²⁴Ami nia maluk balun mos ba to'o rate, hodi hetan buat hotu hanesan feto sira haktuir; maibé sira la haree Nia."

²⁵Nia dehan ba sira: "Imi ema beik duni, no neon badak atu fiar buat hotu ne'ebé profeta sira hateten! ²⁶Mesias sei terus buat hirak ne'e atu nune'e Nia bele tama iha Nia gloria?" ²⁷Hafoin, hahu ho Moises no profeta sira hotu, Nia hanorin ba sira buat hotu ne'ebé hakerek iha Eskritura tomak kona ba Nia. ²⁸Besik ona knua ne'ebé sira atu ba, Nia hakfudik atu la'o ba oin. ²⁹Maibé sira husu maka'as ba Nia, dehan: "Hela ho ami, basa kalan besik ona, loron mos monu dau-daun ona." Nia tama ho sira. ³⁰Hafoin, tur tiha atu han ho sira, Nia kaer paun, fo bensa, silu hodi fahe ba sira. ³¹Sira nia matan nakloke, hodi hatene Jezús; maibé Nia lakon kedas husi sira oin. ³²Sira dehan ba malu: "Ita nia laran la manas wainhira Nia koalia tuir dalan hodi hanorin Eskritura?"

³³Sira hamriik kedas, hodi fila fali ba Jerusalem. Iha ne'ebá sira hetan sira na'in sanulu resin ida halibur hamutuk ho maluk sira seluk, ³⁴ne'ebé dehan ba sira: "Tebes, Na'i moris hi'as ona, hodi mosu ba Simão!" ³⁵Tuir mai, sira haktuir buat ne'ebé mosu iha dalan, oin sa sira hatene Jezús wainhira Nia silu paun.

Jezús mosu ba eskolante sira

³⁶Sira sei koalia hela, Jezús hamriik iha sira leet, hodi dehan ba sira: "Dame hela ho imi!" ³⁷Sira hakfodak no tauk, hodi hanoin katak sira haree mate klamar ida. ³⁸Nia husu ba sira: "Tansa imi fuan taridu hodi husu buat barak iha imi laran?" ³⁹Haree ha'u nia liman no ain ba: Ha'u mak ne'e duni! Imi kaer Ha'u ba, hodi haree katak mate klamar ida isin ho ruin la iha, nu'udar imi haree Ha'u iha." ⁴⁰Dehan tiha ne'e, Nia hatudu ba sira nia liman no ain. ⁴¹Maibé sira la fiar, hodi hakfodak ho ksolok boot. Nia dehan: "Imi iha buat ruma atu han?" ⁴²Sira fo ba Nia ikan tunu baluk ida. ⁴³Nia simu, hodi han iha sira oin. ⁴⁴Hafoin Nia dehan ba sira: "Wainhira Ha'u sei iha imi leet, Ha'u dehan ba imi liafuan hirak ne'e: katak sei sai tuir los lia hotu ne'ebé Moises, profeta no salmu sira hakerek kona ba Ha'u iha Eskritura." ⁴⁵Tuir mai, Nia loke sira neon atu hatene lo-los Eskritura, ⁴⁶hodi dehan ba sira: "Hakerek tiha ona, nune'e mak Messias sei hetan terus no, liu loron tolu, sei moris hi'as. ⁴⁷Hodi nia naran sei haklaken ba nasaun hot-hotu laran moras no perdua ba sala sira, hahu husi Jerusalem. ⁴⁸Imi mak sasin kona ba buat hirak ne'e. ⁴⁹Ha'u sei haruka ba imi Ida ne'ebé ha'u Aman hakotu tiha ona; imi hela lai iha sidade, to'o imi simu tiha kbiit husi leten."

Jezús sa'e ba lalehan

⁵⁰Hafoin Jezús lori sira to'o besik Betania. Iha ne'ebá, Nia foti liman, hodi haraik bensa ba sira. ⁵¹Wainhira Nia sei fo bensa dau-daun, Nia hadook an husi sira, hodi sa'e ba lalehan. ⁵²Sira hakneak iha nia oin, hafoin sira fila ho ksolok boot ba Jerusalem. ⁵³Loron loron sira halibur iha templu, hodi hahi hanai Maromak.